

१४७

दर्ता नं.:४८/२०७६/७७

पुर्खा दयक तक्कगु सम्पत्ति, भीगु कला व संस्कृति
पिकाक-भक्तपुर नगरपालिका



नेपाल संवत् ११४५ थिला गा: / २०८१ पुस १ / 2024 Dec. / ल्या: १२१, दौं:७



बुधप महोत्सव
२०८१ या डलेज्या


दक्षिण कोरियाया महामहिम राजदूत पार्क ताईयोड स्वपय्

(२०८१ मंसिर १७ गते)



पूर्व उद्योगमन्त्री भ्ना बख्खप नगरपालिकाय्

(२०८१ मंसिर १३ गते)



; DkfbSlo

@)*! k' !, c^a\$!&, jif&

देशं दुनय व देशं पिनयया पर्यटक पिनिगु मन क्वसालयगु लिधंसा ख्वप महोत्सव

ता ई निसें पियो च्वंगु ख्वप महोत्सवया उलेज्या विश्व सम्पदाया धलः खय् नां जायो च्वंगु ख्वपया लायकुली लोकंहवाम्हा नेपाल मजदुर किसान पार्टीया नायो भाजु नपां नेपः या वरिष्ठ राजनीतिज्ञ नारायणमान बिजुक्छें (रोहित) जुं पानसय् मता च्याकः याडः दिल । नपां उगु इवल्य् वयकलं नगरपालिकां पिथांगु 'भक्तपुर महोत्सव स्मारिका २०८१ (ख्वः पौ) व ख्वपया सम्पदा व संस्कृतिया 'किपा मुना साफू' नं चिखी फ्यनयगु ज्या याडः द्यूगु खः ।

ज्या इवः उलेज्या याडः दिसे वयकलं छगू छगू भाय्, संस्कृति, तिसावस नपां नसात्वँसा अलय वास्तुकलाय् उगु थाय्या भूगोल व सभ्यताया चिं दइगु खौं ब्याकः दिल । ख्वप दे कला-संस्कृति व सम्पदात ल्यंक, म्वाकः, भिंकः तयगुलि न्हूंगु पुस्तां थःगु कर्तव्य भः पियो ज्या साडः वगुलि लयता प्वंकः दिल ।

ख्वप नगरपालिकां ख्वपया कला-संस्कृति, म्वायगु पहः, स्थानीय कासा ब्वज्या, परम्परागत तिसा वस व पुलांगु शैलीया ज्यापात थःथःगु लागाय् ब्वज्या याय्ता सकल नगरबासी पिन्ता इनाप यागु खः । नगरपालिकाया इनाप काथं स्थानीय जनतां थाय् थासय् योमारी, चतामारी, सम्हेबजी थजगु नेवाः नसात, मियगु निसें भ्नीगु पुखां याडः वांगु पुलांगु ज्यात बजी, ल्हुयगु, कुतिवाय्गु, थाज्या थाय्गु, पोहाय्गु, ऐला कायगु, भालाछियगु थजगु अपलं मछ्यलय् धुंगु व तानिथें च्वंगु ज्याया ब्वज्यां नेवः तय्गु कला कौशल गथे खः ? धाय्गु नगरया थाय् थासय् क्यडः च्वंगु दः ।

स्थानीय पाठ्यक्रम दय्कः ब्वंकः च्वंगु ब्वनय्कुथिया ब्वनामिपिन्ता ख्वपमहोत्सव छगू ग्यसुलागु स्वयो सय्केगु थाय् जूगु दः । पाठ्यक्रमय दूतिड तःगु फुक्क धाय्थें विषयया खौंत थाना थःगु मिखालं हे स्वयं दैगु काथं नगरपालिकां ब्यवस्था याडः तःगु दः । शिक्षक, ब्वनामिपुं, अभिभावकपुं सकलें ख्वपया तजिलजित पिब्वयो तःगु थासय् मन क्वथिइक स्वयो च्वंगु खानय् दः ।

महोत्सवया सातिखुनुं निसें स्वः भूःपिनिगु हुल स्वयबलय् न्हिं लाखौं मनूत महोत्सव स्वःवगु खानय् दः । देशं दूनय् व देशं पिनयया पर्यटक पिन्ता मनक्वसाय्कः सालः ख्वप देता पर्यटकपुं छकः मवसें मगागु थाय् (गन्तव्य स्थल) काथं च्वन्ह्याकेगु तातुना नगरपालिकां तःगु खानय् दः । उगु तातुना पूवांकय्ना नगरपालिकां इलयब्यलय् योमारी उत्सव, घरेलु उत्पादन मेला, बहाबहा म्हासिके ज्या इवः, पुखु म्हासिके पदयात्रा, थजगु ज्या इवःत न्ह्याकः वयो च्वंगु दः । अजगु ज्या इवः त महोत्सवया लिधंसा जुगु दः ।

थवनं हाँ २०५४ सालय भक्तपुर महोत्सव जूजु खःसा अः न्ह्याडः च्वंगु महोत्सवता नेकगु 'ख्वप महोत्सव' धःसां पाइमखु । उगुइलय ख्वपया न्हय्गु थाय्ता जक मू थाय् काथं क्वःछिडः ज्या भूःत न्ह्याकगु खःसा थव पालय् पुलांगु नगर ब्याकः ब्वज्या याडः च्वंगु दः ।

हिन्त्यगु निसें हिंडागु शदीतक राजधानी सहर जुयो च्वंगु ख्वप देशय् लिच्छवीकालीन व मल्लकालीन अपलं सम्पदात गथे खः अथेहे म्वाडः च्वंगु दः । २०७२ सालया तः भवखाचां स्यंकः थुडः ब्यूगु सच्छिगु मयांकं सम्पदात ख्वप नगरपालिकां ल्हवडः दानय्गु ज्या क्वचाय्के धुकल । छगूनेगु ल्यं दःगु सम्पदात नं अःल्हवडः च्वंगु खौं नगरपालिकां धायो च्वंगु दः ।

ख्वप महोत्सव स्वःभाइपिनिगु म्हुतुं नेवःनसा त्वसाया सा सागु सबः काय् दै, मिखालं बां बांलागु ज्या खौं स्वय् दै अलय नुगलय् न्हूँ न्हूँगु ज्ञान स्वथाडः वानय् दै । थुकाथं स्वयबलय् ख्वप महोत्सव सकलसिया लागिं ज्ञान काय्दैगु महोत्सव जुइगु गनरपालिकां धायो च्वंगु दः ।

महोत्सवया इलय् जूगु बाँसुरी बाजाया धिंधिं बल्ला मेगु छगू विशेषता खः । थी थी जिल्लाया नपां पीन्हय्थव पुचलं ब्वतिकःगु उगु धिं धिं बल्लाया लिधंसाय् संस्कृतिया लाँपु ज्वडः ख्वपदेशं मेमेगु जिल्ला नपां स्वापु तयो वानय् फँगु विश्वास कायो च्वंगु दः । देशादेछिया पालिकाया प्रमुखपुं व विदेशी कुतनीतिज्ञपिन्ता नं महोत्सव स्वः भाय्ता ब्वडः च्वंगुलिं महोत्सव ख्वपदेता हलिमय् म्हासिके वियगु स्यल्लागु लिधंसा जुई ।

पिकाक-ख्वप नगरपालिका/सम्पादक-आशाकुमार चिकंबञ्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्याः ०१-६६१३०४३, इ-मेल- khwopapau@gmail.com



का.रोहितया चीन यात्रा तियान तोङ्ग बिहार

७ भाद्र २०५२ (25 August 1995) विहिवार खुनुं फुहा सहर पुल:८:०० ताइलय सुथाय् चेच्याङ्ग प्रान्तया छगू तस्कं न्हँ पहःया आधुनिक गामय् ९:३० ताइलय् थ्यन । राजमार्ग त्वःत जिपुं १०-१५ माइल न्हँगु पीच लाँ जुयो छखा आधुनिक भवनया हःनय् भासु लांका ।

उगु गांया पार्टीया छ्याञ्जे पार्टी पाखं अलग आनाया जनतापाखं नेपःया पासाता लसकुस याय धायोदिल अलय मेमेपुं पदाधिकारी पिन्ता नं म्हासिइकः बिला । उगु गांया म्हासिइका पिप्वयो दिसें वयकलं वहे गामयँ सःगु पासी चक्कुं ताडः बियो दिल । अङ्गुर व मेमेगु फलफूल जःगु रिकापी हज्याकसें धायोदिल । दकलय न्हापां भ्नी थ्व गांया भिडियो टेप निं स्वय, अलय खाँ ल्हाल्हां गां चाहिलय् मज्यूला धायोदिल ।

जिं ज्यू दक कपः सांका अलय किपालु (भिडियो) खय् उगु गांया बुँज्या, व सैगु अन्न(बालीनाली), डा अलय बङ्गुर लहिडः तःगु, पुखु, कारखाना, सांस्कृतिक भवन थीथी स्वस्वं वाडा । थुगु प्रान्तया डासगु गां मध्ये थ्व छगू नमुना गां खः । २५८ गू परिवार,

८०० म्हा मनु (जनसंख्या) अलय ५४ गू हेक्टर जग्गा दःगु थुगु गामय ८०० मुसं बुँ ज्या याई । उकिया निंतिं गुम्हा किसान तयसं जक दाचिछयंक ज्या सानि । कृषि, साँ, में, (पशुपालन) आदि लहियगु, सिसाफल, तरकारी, डा व स्वं या लागिं खुम्हासिं दाचिछतक बिचःयाई, स्वई, ट्रयाक्टरं बुँ पाली । मेसिनं वा पिइ, वा लै । वा, छ्व क्यलय्ता कलघर दः । सुन्तला, अङ्गुर, पासी थीथी थानाया मू मू सिसाफल खःसा डा, हायँ, खा, फाँ थी थी थानाया पशु लहिडः हुकँयाई ।

पशुपंछीया सः (खाखी, गोबर) मुडः गोबर ग्याँस पिकायो भुथुली मिच्याकी अलय व छ्यलय् धुंगु सःता लिपा कम्पोष्ट सः नं दय्की । थुगु गामय १६ गू कल-कारखानात दः । बाकस दयकिगु, काप व छेंगुया कोट व नं सुइगु कृत्रिम हिरा दय्केगु थजगु थानाया मू मू कारखानात खः । १९६५ तक थुगु गांया उलि विकास जुय मफूगु तिनि । १९७८ लिपातिनि थुगु गामय विकास याडः हःगु खः । १९८१ निसें कृषि उत्पादनय् थवं चवजायक विकास याता अलय १९९० निसें वस्तु लहियगु (पशुपालन) लि बः याता । अः ११ म्हा फाँ दः धाय्गु खाँ काडा । १९९१ सं थुगु गामं उत्पादन या मू नेगू करोड व गुइगु लाख यूआन थ्यन ।

खाँ ल्हाय धुकः जिपू गां स्वः वाडा । अथेहे १०-१२ फिट ब्या दःगु

छगू नहर नपां छपु पक्की पीच याडः तःगु लाँ थुकिता घेरय् याडः तःगु दः । न्हँगु बस्ती व पुलांगु बस्तीया दशवी दशवी ५-६ फिट व्यागु नहरत दः । नहरय् डा लाहियगु ज्या याइसा नहरया देनय् पँबालात तयो अंगुरमा पिडः सयकः तःगु दः । छम्हासिता १६ वर्ग मिटर ल्याखं छँ इडः बियो तःगु दः । तःतः खागू छँ धःसा गुगू परिवारता इडः तयो तःगु दः । छगू परिवारता थयं मथयं ३१.५ वर्गमिटरया ल्याखं थयः वई ।

जिमिसं तरकारीया पुसा थ्वकिगु थाय् (छँ), स्वंमा पिइगु व हवय्कः मिइगु थाय्, फाँ लहिइगु, गोबर ग्याँस प्लान्ट, तरकारी व जाकी पसः स्व स्वं प्याखं ल्हूइगु कासा म्हेतिगु व हायँपुकिगु सांस्कृतिक भवनया कःसिं गां स्वया ।

खाँ ल्हाल्हां वाडा । का सचिव ज्यू धायोदिल-‘१९७८ निसें अपल उत्पादन जुगु जक मखु व बांलाड स्तर नं चवजाय्कगु जुल । १९७८ निसें प्रतिब्यक्ति आय (छम्हाम्हासिया ल्याखं आमदानी) अप्वयो ११० युआन थयंकगु जुल । अःधासा अजगु छम्हा छम्हा मनूया प्रतिब्यक्ति आय ५०३६ युआन थयंगु दः । थुगु गां उद्योग, सांस्कृतिक व व्यापारया नमुना जुगु दः । फुक्कासिता नपां उथिंयंकः तः मि याय्गु पार्टीया नीतिकाथं थुगु गांया विकास जूगु खः ।

सच्छिख्त स्वीच्यागूगु स्वप पौ. ब.छि पौ(पाक्षिक)

जिगु न्हयसः या लिसः व्यू ब्यू वयकलं धा धां यंकल - 'थाना किसानत बाहमास्या म्हेतिमखु, ल्वापु थै मखु, खुयो काय्गु, मेमेगु- म्वमरुगु ल्वापु खाँ ल्हाडः अपराधिक ज्या याई मखु । थाना ज्या मदयक लाहा प्वः चिडः चवनय मःपुं मरु बरु मेगु गामं द्रुछिम्हा स्वयो अपः ज्यासानिपुं श्रमशक्ति ह्यो थाना छ्यल्य हःगु दः । सच्छिगु स्वयो

अपः उद्योगया प्राविधिक स्नातकपुं थाना ज्या साडः च्वंगु दः । जीवन सुरक्षाया नितिं अनेक लोक कल्याणया ज्यात याडः वयो च्वंगु दः गथेकि - अस्पताल, थाकालीपुं अवकाश जुय धुपुं बुहाबुही पिनिगु लागिं (आदर निकेतन) छँ, ग्याँस, उपचार व माध्यमिक तगितक ध्यबा म्वायकः ब्वंकिगु निःशुल्क शिक्षाया व्यवस्था दः ।

जिगु मनया छगू छगू खाँया लिसः ब्यू ब्यू सचिव जुं धाधावान- 'बुलुहुँ- बुलुहुँ सहर व गां काथं छुं मपाडः उथिंग्यडः वानि । बुँज्याया इलय् जक श्रम शक्ति छ्यली, किसानत थें याडः । अः बच्छीति छँ टेलिफोनया ब्यवस्था दः । श्व छगू नमूना गां जूगुलिं पीगू मित्रदेशय् नेसम्हा स्वयो अपः पासापुं थुगु गां स्वः भ्काय धुंकल । केन्द्रपाखं पार्टीया महासचिव व राष्ट्र पति चियाड्ग चमिन व मेमेपुं प्रान्तीय नेतापिसं नं थाना वयो स्वयो भ्काय धुंकल ।'

वनलिं जिपुं विदेशीतय्गु नं

मंकःलाय छ्यलः तःगु नं सुइगु (पोशाक) कारखाना स्वः वाडा । हंगकंगया छम्हा ब्यापारीं धः काथं मंकः लाय छ्यलागु थुगु कारखानां पिकःगु नं (कोट, पाइन्ट, जकेटत) जापान, सं. रा. अमेरिका, स्वीट्जरल्याण्ड थी थी पश्चिमी व विकसित देशय मिगु यंकी अथे धाय् निर्यात याई । मेसिन,

युआन मू क्वतिया उत्पादन याता । ८५ लाख युआन चोखै लबः दता अलय छम्हा छम्हा ज्यामितयूता २० हजार युआन लब थ्यात । १९९१ या न्हापां थुकिया लाय ५० लाख युआन जक खः । लिपा उगु लाय १० करोड युआन थ्यन । काप थाइगु उद्योग व कारखाना नपां नं थुगु कारखानाया स्वापु दः ।

कारखानाय् अपलं मिसात जक खाडा । छता छताखय हे सच्छिम्हा- सच्छिम्हा स्वयो अपः च्वडः ज्या सानय् ज्यूगु क्वथाया स्वगुंतुं तल्लाय् वाडः स्वया । मेगु छँ थी थी सिधय्क तःगु तयारी कोट, प्यान्ट व जाकेटत ब्वयो तःगु दः । कारखानाया लकस बिस्कं पहःया दः । गनां काप दाडः स्वयो च्याड च्वंगु, गनां सुज्या सुयो च्वंगु, गनां स्वापु ह्वडः च्वंगु, गनां इस्त्री याडः च्वंपुं ज्यामित थाय् थासय् च्वडः थः थः गु ज्या क्वथिइकः याडः च्वना ।

श्व हे काप कारखाना व मे मेगु कारखानां पिकःगु सामानत विदेशय् छ्वयो हे थुगु गांया छम्हा छम्हासिया प्रतिव्यक्ति आमदानी अपलं च्वजायो वांगु सियदः । आनाया

टेबुल व

मेमेगु सामानत नं जापान हे न्याडः आयात यागु जुयो च्वना । न्हापां थुकीं २,५०,००० युआन क्वति मूयाति जक पिकाय फःगु खः । १९९४ खय् थानान ५ अर्ब युआन क्वतिया नंत पिकाला । अथे हे १९९५ खय् ५ अर्ब १७ करोड

पदधिकारीपुं थुगु गां या आर्थिक विकास हे पार्टीया खुल्ला नीति व आर्थिक उदारीकरण खः जक धाई । पार्टीया अवकास जुय धुंकम्हा सचिव जु याता नं नपा लाडा । नानकिड्गय् फय्खतं वानय मःगुलिं जिपुं काचाकुचु विदा पवड वाडा ।





खवप दे पर्यटकपुं छकः मवसें मगागु थाय दयकेगु कुत याडः चवडा

सिहे स्पू। वहें खाँया न्हापांगु पत्रकार सम्मेलन २०८१ कार्तिक २८ गते छिकपिन्ता खवप महोत्सवया तातुना व प्रारम्भिक तयारीया खाँ व्याकय् धुंग खः। श्व हे खाँयँ थौं भी हकनं खवप महोत्सवया खाँयँ अः तक ज्या जुयो च्वंगु खाँ व्याकयता सःतः चवडा।

श्वहे २०८१ मंसिर २८ गते निसें पुस २ गतेतक जुइगु खवप महोत्सवया फुक्क धाय्थें (तयारी) ज्यापा सिघल धः सां ज्यु वहे ज्या काथं सांस्कृतिक ज्या इवः सं नीस्वथव थी थी प्याखं पुचसं ख्वी स्वंगू पुचलं ब्वति काई। उकिता थाय् काथं खवपया लाय्कु, तः माही, दतात्रय, क्वाठण्डौ त्वालय पिब्वइगु जुल। खुताजि बाजाया १०१ श्व बाजा पुचः लं नगरया (प्रदक्षिणा मार्ग) खवप दे चाहिल बाजा पुयो थाडः चाहिली। अथेहे खवप नगर दुनयया स्वी श्व, खवप बाहेकं मेगु नगरपालिकां डाश्व, खवप जिल्ला बाहेकं मेगु जिल्लाया च्याथव पुचः याडः मुक्कं ४७ श्व बाँसुरी बाजा पुचलं धिं धिं बल्लाखय् ब्वति काई। उगु बाँसुरी बाजा पुचः मध्ये २०८१ मंसिर २९ गते स्वी स्वथव पुचलं पिब्वई सा मंसिर ३० गते ल्यं दगु हिं स्वथवता धिं धिं बल्ला याकय्गु ब्यवस्था यागु दः। धिं धिं बल्लाय तः ला पिन्ता मड्सिर ३० गते क्वाठण्डौ त्वालय् सिरपा लः ल्हाय्गु ज्या जुई। खवपया मुलाछँ व वाकुपति नारां छो थाय् परम्परागत बाजात थी थी खिं बाजात, लालाखिं, धौं नाय्खिं क्वेँखिं ढलक, तमर (तबला) धिमायँ पछिमाँ, मादल (मगः खिं) ब्वज्या जुई। अथेहे नगरया डाथाय् नौबाजा पिब्वयगु याई। अथेहे खवपया लाय्कुलि परम्परागत नगरावादन थाइसा नगरया त्वालय-त्वालय् पीखुथव स्वयो अपः

भजन पुचलं भजन हालिगु खाँ नं व्याक चवडा। अथेहे नगरया खुथाय् बुबः सियो दयकिगु हलिमली ब्वज्या याई। खवपय् डाय्किगु थी थी जात्रा पर्वया नमूना ब्वज्याया ब्ववस्था गःहिति याई। उकि मध्ये पुलुकिसी, सुतिभैल, ताहामचा, भैलखः गाठामगः व योसिंछोया नमूना ब्वज्या याई।

प्रशन्नशील महाविहारय् कुमारी दर्शनया व्यवस्था यागु दः। प्रशन्नशील महाविहारय् नपां खवपया डागू महाविहारय् दीपडकर बुद्धया ब्वज्या जुई। खवप इनाचोया मुनिविहारय् बुद्ध अस्तु व बौद्ध दर्शन ब्वज्या जुई। अथेहे खवपया लोकंहवागु नवदुर्गा छो ब्वयकेगु व दर्शनया ब्यवस्था नवदुर्गा छो छँ हःनयँ गः छँ जुई।

लोकं हवागु डय्डापा इयो या दरबारय् नेवः समूदायया परम्परागत पौभा ब्वज्या जुइसा नगरया न्हयथाय् किपा ब्वज्या नेथाय् च्वयागु किपा ब्वज्या व लाय्कुली छ्वाली कला ब्वज्या जुई। नगरया न्हयथाय् नेवः तय्गु परम्परागत तिसावस ब्वज्या नपां मियगु नपां दतात्रय लाय्कु, व तःमाही नेवः तिसा वस बः लं कायो किपा (फोटो काय्गु ब्यवस्था दः।

नगरया प्यथाय् ब्यासी, भोलाछँ, वातिकुथि व लाकुलाछँ नेवः तय्गु परम्परागत कासाता (कसिमला पायँ, घचा, अमूकासा, एकं दला, धुँ चोलय्चा, काना काना पिचा, ध्वाइँ कासा, खिप कासा, लोहँदाया खौ दायां, वं वा श्वं वा, कैची, चिँ मुसी चिँ, ह्वाग्रा (खोपि), छुँ भौ कासा, हःपालुं, ताता मकुचा, चिकासा, मन्डली क्यंकय्गु, पायँ म्हेतय्गु रुमाल कासा, च्याम्पति चाहिइकेगु पँ बालाया फिरिफिरिचा चहिइकेगु (भ्वँ

कला, संस्कृति व सभ्यता मानव सभ्यताया कथहं खः। ऐतिहासिक व सांस्कृतिक सम्पदाया महत्व व थुकिता छ्यलयगु खाँयँ जनचेतना ग्वाकः थुकिता ल्यंकः, म्वाकः खवप देयाता पर्यटकपुं छक मवसे मगागु गन्तव्य स्थल दयकेगु कुतः जुयो च्वंगु दः। खवप नगरपालिकां पुखां दयक तकगु सम्पति, भीगु कला, व संस्कृति' नाराता च्वजायकः पीदा हाँ निसे थानाया मूर्त व अमूर्त सम्पदात ल्यंकः म्वाकः तयो थुकिता ध्वासा जुइगु पर्यटन उद्योगत ह्ज्याड नगरया आर्थिक विकास यायता थी थी ज्या इवःत न्ह्याकः हज्याड च्वंगु सकसिनं स्पूगु हे खाँ खः।

खवपया थःगु पहः, थानाया कला, संस्कृति, सम्पदा, हस्तकला व घरेलू उद्योग नपां स्वापु दःगु भीगु थःगु मौलिक उत्पादन व भीगु थःगु म्वायगु पहः ता च्वजायकेता नपां ल्यंकः म्वाकः हज्याकः यंकयता देशं दुनय व देशपिनय्या पर्यटनया लिधंसाय पर्यटन उद्योगपाखं नगर व नगरवासी पिनिगु आर्थिक ज्या इवत हज्याकः आम्वानीया लुखा चाय्केगुलि ध्वासा जुइगु तातुडः 'खवप महोत्सव २०८१' ग्वसः ग्वयागु छिकपिसं

सच्छिव स्वीच्यागूग स्वप पौ. ब.छि पौ(पाक्षिक)

यायु) भुतिमा वयकेगु थजगु जीवज्त् वज्या आधुनिक कासा पाख्य खो खो कबड्डी किक बक्सिड, तेक्वान्डो, कराँते, उसु, भलिबल, जिम्नास्तिकथजगु कासात सहिद स्मृति कासा ख्यलय क्यनिगु जुई ।

खपया नां जःगु जुजु धौ या महोत्सव लालाछँ स्वंग ल्वहँ (इनाचो) व जेलायँ वइसा आना थी थी धौ वज्या नपां मियगु नं ब्यवस्था दः ।

खपया लोकं ह्वागु भाज्या पुखु व कमलविनायक पुखुली नसा महोत्सव जुई । उगु थासय् पी स्वंगू स्टलय् थी थी परम्परागत नेवः व आधुनिक नसा ज्वलं मियगु नं याई । या फुक्क त्वाल्य त्वाल्य स्थानीय समूदाय मिसापुचः टीम, क्लब, वनय्कुथि व सहकारी संघ संस्था पाखं नीगूगु नसा मिडगु थाय् तयकः खप महोत्सव स्वः भइपुं देशं दुनय् व देशं पिनय्या पर्यटकपिन्ता थी थी नसा ज्वलं लसकुस यायगु ब्यवस्था काथं तयकागु खः ।

मनूया सभ्यताया पुलां पुलांगु पेशा मध्ये चायाभाला छियगु (मृत्तिका) कला नं नेवःया बुसानिसँ सीबल्य तकया संस्कारया छ्यलिगु चा यायगु भालात नं वज्या जुई ।

नगरया थी थी हिं छथाय् स्थानीय नेवःतयगु बुसां निसँ सीडबल्य तक याइगु थी थी संस्कारत मध्ये, मचाबु ब्यकिगु, मया चिपं थिडकेगु, न्यदा बुदिं, प्यदा बुदिं, इहीं कयतापूजा, बाहा, इहिपा जंको थजगु संस्कारया नमुना वज्याया व्यवस्था याडागु दः । नगरया थी थी थासय परम्परागत सीप व कलानपां स्वापु दःगु बजी ल्हयगु थ्वँ थुयगु ऐला कायगु, वा सुयगु, थाज्या थायगु, थाज्या यनेगु ज्यातं आना हे स्वय दै । खपया सः कुलां व इचाडोल्य न्हा यायथें चिकं काकयगु चिकं सः तयो हे क्यनि ।

खपया लॉम्हागाल्य थी थी हिंच्यागु पिथना छँ (प्रकाशन गृह) पाखं नीडागू स्टलय् थी थी साफू वज्या जुई । खप नगरपालिकापाखं चायकः तःगु खप कलेज

देकोचा, खप इन्जिनियरिड कलेज, खप कलेज अफ इन्जिनियरिड लिबाली शैक्षिक वज्या याई । खप कलेज देकोचाय् नीखूगु वनय् कुथिपाखं व खप इन्जिनियरिड कलेजय् वास्तुसम्बन्धी गूगु सिभिल इन्जिनियरिड्या हिगू वज्या याई । खप कलेजय साहित्यकार हृदय चन्द्र सिंह प्रधान नां जःगु छधा प्याखंत न्हिया न्हिथं क्यनि ।

खप नगरपालिका वडा नं. ५ पसिखेल्य तरकारी बजारय् कृषि उत्पादनया व्यावसयाष्किक प्रदर्शनी जुई । तरकारी बजारय् स्थानीय व्यापारी पिनिपाखं तरकारी मियगु ब्यवस्था याडः च्वंगु दः । अथेहे ५ वडा योसिंख्यलय हिनेगु वनय्कु थि पाखं बाल मैत्री वज्या याई । आना मचातय्ता लयताय्केता ख्वालय् च्वयगु फेस पेन्टिड किड्स प्ले स्टेशन साँस्कृतिक वज्या मचाकासा फि आर्टस कर्नर बाल स्काउट ज्या इवः शैक्षिक सामग्री वज्या फोटो कुँ, पेंचुलयगु नं ब्यवस्था दः ।

नगरया स्वथाय् नः पुखुलि नासमना व तेखापुखुली घरेलु तथा साना उद्योग नपां स्वापु दःगु परम्परागत सीप, कलाया आन हे जीवन्त क्यनिगु नपां आना हे मिडगु नं याई । थालाछँ व गोमारी परम्परागत का छियगु वज्या गोमारी याताय् गूगु सहकारीया हिप्यंगू स्टल व सहकारी ज्या इवः नपां न्हिया न्हिथं साँस्कृतिक वज्या नं जुई सा स्वः वइपिन्ता नसा ज्वलं न्याडः नय्गु नं ब्यवस्था दः ।

खपया प्यंगः पुखुली डुडगाय् च्वडः हार्यं पुकय्गु ब्यवस्था दःसा नः पुखुली वाटर साइक्लिड याय्गु वस्था दः । डुडगा नी स्वंगः दः । चिच्याहां ब्यासी व महेश्वरी कासा ख्यलय् ब्यापार मेला दः चिच्याहां ब्यासी आधुनिक डोम स्टलया ब्यवस्था नपां पीगू स्टल व महेश्वरी गुडगू स्टल बुक जुय धुंकगु खः ।

तः पुखु व यातु बाहे पालाचा च्याकय्गु नपां भाज्या पुखुया जलेश्वर देगलय्

मता च्याकय्गु जुईसा लाय्कुली थी थी मूतिकार पिनिपाखं मूर्ति वज्या जुई । महोत्सव स्वः वइपिन्ता नगरया न्हय्गू थासय् (क्वाठण्डौ, दतात्रय, तःमाही, तालाक्व, खलौ, रानीपुखु, यातु बाहे) महोत्सवता स्वयो इन्टरनेट सेवा प्रदायक वर्ल्डलिड्क नपां सम्भौता याडः निःशुल्क वाइफाइया ब्यवस्था याडागु दः । महोत्सवय् भाइपुं सकल पाहाँपिन्ता मः काथ्या सेवा सँविधा बियता नगरया थी थी हिंच्याथाय् सूचना केन्द्र हिप्यथाय् प्राथमिक उपचार केन्द्र स्वीथाय् स्वयो अपः थासय् त्वनय्गु नाःया ब्यवस्था स्वीथाय् स्वयो अपः शौचालयया ब्यवस्था नीनेगू पार्किड स्थल दयकागु दः । महोत्सवता स्वयो नगरया पुलांगु लागाय् सुथाय् ९:०० ता इलय् निसँ बहनी ६:०० ता इलय् तक आकस्मिक सेवा बाहेकं नगरया हिं गुथाय् सवारी साधन पानय् यागु दः ।

महोत्सव ज्वः छि शान्ति सुरक्षा व ट्राफिकब्यवस्थापनया लागिं जिल्ला प्रशासन कार्यालय भक्तपुर जिल्ला ट्राफिक प्रहरी परिसर भक्तपुर सशस्त्र प्रहरी बल भक्तपुर नपांया सुरक्षा निकायत नपां मिलय जुयो ज्या इवः हज्याकागु जुल । महोत्सवता तः जिक व तः लाक हानय्ता स्थानीय स्काउटया ५०० म्हा, स्काउटमास्टर ७५ म्हा याडः मुक्कं ५७५ म्हा स्काउट छ्यली । न्हिं २५० म्हा याडः मू मू थासय् स्वयम सेवा याइसा वनय्कुथि व कलेजया वन्यामिपुं व मेपुं ग्वाहालीमिपुं नं तयारी दःगु खौ ब्याकः च्वडा ।

न्हा याय् थें थाना भायो द्यूपुं सकल पत्रकारपिसं महोत्सवया मःगु फुक्क खौत प्रचार प्रसार याडः दिइगु आशा नपां सुभाय देछाय् ।

(खप नगरपालिकाया प्रमुख नपां भक्तपुर महोत्सव मूल समारोह समितिया कजि सुनिल प्रजापति जुं आइतबार ग्वसः ग्वगु पत्रकार नपालाय्गु ज्या इवः सं बियो द्युगु न्वचुया भाय हिला, सं.)

लगानी बोर्ड ऐन: देशघाती शासकपिन्ता खुँयाता

स्वन्हँ धानय् थें

विवेक

प्रधानमन्त्री के.पि. ओली चीन भ्रमण वानयँ हँ चवंगु लगानी बोर्डया ६० कगु बैठकं चवयया कर्णाली परियोजनासं जी. एम. आर नपां सतलज व इरेदा कम्पनी याय्गु नं स्वामित्व दय्केगू खाँ क्व: छय्गुता अनुमोदन यात । २०६५ सालय हे उब्लेया प्र.मं. प्रचण्ड उगु ९०० मेघावाटया विद्युत परियोजना भारतीय कम्पनी जिएम आरता वियगु क्व: छय्गु ख: ।

विश्व बैंक ध: काथं उगु छपु खुसीं जक ४९८० मे. वा. विद्युत पिकाय् फ: । न्ह:पां ३०० मे. वा. जक विद्युत पिकाय्गु सम्भौता जूगु ख: । सम्भौताखय् उगु खुसीया चवय क्वय ३० दातक सुननं उकिया ना: छ्यलय् दैमखु जक सर्त तयो सम्भौता यागु ख: । नेप: या ना: नेपालं छ्यलय् मदैगु याड: जुगु देशघाती सम्भौताया विरोधय् नेपाल मजदूर किसान पार्टी नपां कर्णाली लागाया विशेषयाड: दैलेख, अछामनपांया स्थानीय जनतात दड वगू ख: । वनलिं ३०० मे. वा. विजुली स्वयो ९०० मे. वा बिजुलीया सम्भौता याता ।

अलय सम्भौता याय्ता जि एम आर कम्पनी इलय हे परियोजनाया लागि म:गु लाय मुनय ह्य मफ: । त:क हे म्याद ताड: ब्यूसां लाय् तय ह्य मफ सेलिं सर्वोच्च अदालतं हे २०८१ माघ ४ गते तकया ई तयो उगु इलय्तक नं ज्या सानय् मफ:सा सम्भौता खारेज जुइगु निपं (फैसला) याता । उकिंलिपा तिनि जि एम आर कम्पनी लाय मुनय्ता नुग: क्वाक जुला । अलय वं हे नेप:या खुसीं विद्युत पिकाय्गु खाँ लाय छ्यय्केता

टेन्डर याता । वं नेगू भारतीय कम्पनीत सतलज व इरेदा कम्पनीता लागत तय्केगु दक क्व छित । वहे निपंयाता प्रधानमन्त्री के.पि. ओलीया नायोसुई १३ मंसिरय् चवंगु लगानी बोर्डया बैठकं जि एम आरं म्यूगु शेयर (३४ प्रतिशत सतलज व ५ प्रतिशत इरेदा कम्पनीता बियगु निपं अनुमोदन याता । व भीगु प्राकृतिक स्रोतय भारतीय कम्पनीता हैकम ल्यंक तयगु स्वीकृति थें हे ख: । थजगु ज्या देशघाती मखुसँ छु जुई ? छु छुनं स्वतन्त्र व सार्वभौम देशं थ:गु प्राकृतिक स्रोत व साधनय् मेपुं सुं ठेकेदार यागु टेण्डरता थमनं स्वीकार याइला ? कतामारी जुयो चवंगु, देशं बाहेकं छुं नं स्वतन्त्र व सार्वभौम देशय व याय् फै मखु ।

नेप: नं छगू सार्वभौम देश ख: । नेप. या सीमाचिं दुनयया जल, जमिन व जङ्गल (ना: बाँ व गूँ) फुक्क थासय् सरकारया छपुतं स्वामित्व दै । व स्वंगू करोड नेप: मिपिनिगु मंक: सम्पति ख: । छुं नं भौतिक निर्माणया लागिं सुं नं विदेशी लाय् छ्यलामिपिसं ठेक्का लाकय् वं हे परियोजनासं वयाय्गु हक (स्वामित्व) दै धाय्गु मखु । नेप: या सरकार नपां सम्भौता याम्हा जी एम आई इलय हे म:गु स्रोत तय ह्यमफूसेलिं कानून काथं क्षतिपूर्ति पुइक: सम्भौता स्वत: खारेज याय म:गु ख: । अलय थानाया ध:सा अख: स्रोत मुनय मफूम्हा जी एम आरं मंक ज्या सानय्या लागिं इनाप याबलय सरकारं म्हुतु प्व: तिड: चवंगु जक मखु वं ल्य:गु कम्पनीता नपां अनुमोदन याता । थव न कानून काथं मिलय जू न

व्यावहारिक काथं हे । भीगु सम्पतिखय विदेशी कम्पनीया स्वामित्व द: जक ककु लथ्याय्गु राष्ट्रघाती पला ख: । थव नजिरं कन्हे देशं त:त: हांगु मूल्य त फुकय मालय योनी ।

लगानी बोर्ड ऐन स्वयम राष्ट्रघातीतय्ता अ:पुक विइगु कानून ख: । उकियागू तातुना आर्थिक निकासया नामय सार्वजनिक, निजी साभेदारी, सरकारी, स्वदेशी व विदेशी निजी लागाया लाय दुकाय्गु ख: । विदेशी सरकारी व निजी लागाता नेप: या प्राकृतिक स्रोत व साधनसं खुला नियन्त्रण याय्गु लकस बियगु काथंया ज्या लगानी बोर्ड ऐनं याड: चवंगु द: ।

थवनं हँ नेप: या प्राकृतिक स्रोत साधन नपां स्वापु द:गु सम्भौता संसद्या स्वढव खय् नेढवया बहुमतं पारित याय म:गु संबैधानिक व्यवस्था द:गु ख: । उगु व्यवस्थां नेप: या प्राकृतिक स्रोतत विदेशीतय्ता अ:पूक बिय फैमखु । उकिता अ: पुकय्ता नेका, एमाले व माओवादीत जाड लगानी बोर्ड ऐन दयकगु ख: । २०६८ साउन ३० गते पारित जूगु उगु ऐनं देया तस्कं महत्वं ज:गु फुक्क घाय्थें परियोजनात तप्यंक: विदेशीया लाहातय् ल: ल्हाय फैगु कानुनी व्यवस्था याता । नेप: या संसद् स्वयो प्रधानमन्त्रीमा नायोसुई नि:स्वानिगु लगानी बोर्डता अधिकारं जायक: बिल । देया स्रोत व साधनय् गथे शासकपिसं थ: यत्थें छ्यलिगु धाय्गु छगू स्यल्लागु दसु लगानी बोर्ड ऐन नं ख: ।

लगानी बोर्ड ऐन छ्यलय् हयवं नेपालय विदेशीत लाय छ्यलयगु त्वह:

सच्छिव स्तीच्यागूग स्वप पौ. ब.छि पौ(पाक्षिक)

तयो नेपः या जलस्रोत व मेमेगु स्रोत व साधनय् मिखा तयो लाक कः वैगु खाँ नेपाल मजदुर किसान पार्टी न्हपाहे चाय्कः धःगु खः । व धात्थेगु खाँ अः सकलसिनं खाडः च्वंगु दः । सरकारं धःथे देशया आर्थिक विकास जुइगु खःसा अः तकखय् नेपः दे च्वजाय् मःगु खः । अथेनं विदेशीत विकास लगानीया नामय् त्वहः तयो शोषण व शासन यो वयो च्वंगु दः ।

नेपः या सरकारं क्वः छ्युगु द्रुत सडक, सुरुड मार्ग, रेलमार्ग, रोपवे, टूलिबस, फोहर मैला व्यवस्थापन अन्तरराष्ट्रिय विमानस्थल दयकेगु कारखाना दयकेगु, पेट्रोलियम पदार्थ पिकाय्गु, तःतः हांगु ताँ व संरचनात दयकेगु, स्वसगु शैय्या स्वयो तहांगु अस्पताल, नर्सिङ होम, १० अर्ब स्वयो अपः लाय् छ्यलिगु विद्युत परियोजना वा पूर्वाधार दयकेगुलि तप्यंक लगानी बोर्ड ऐन २०६८ पाखं यागु दः ।

अः लगानी बोर्डया सदस्य सचिवय्, सुशिल ज्वाली दुतिंगु दः । ज्वाली श्व नं हाँ पुनः निर्माण प्राधिकरण ज्या सांगु इलय नं वायगु बांलागु पहः मरु ज्या गति मरु । अझ वं तप्यंकः पक्षपात व महितां स्वयो ज्या सानिम्हा काथं म्हासिइकः च्वंगु दः । खवप नगरपालिकाता यागु छगू व्यक्त्वगु मतिं यागु ज्या छगू दसु जक खः । सम्पदा ल्हवनय्-कानयगु इवल्य पुनः निर्माण प्राधिकरण पाखं डागु करोडतका छखय् लिइकगु खः । नगरपालिकां सम्पदाया थःगु पहः ल्यंकः म्वाकः तय्ता ठेक्का मढ्यसें उपभोक्ता समितिपाखं ज्या सांकय्गु धायाबलय् निर्णय जुयो छ्यकेगु थ्यं-मथ्यं अन्तिम चरणय् थ्यनय् धुंगु व बजेट नपां खवप नगरपालिका छ्वयो महसिं पांम्हा मनु खः ।

व लगानी बोर्डय् प्रमुखय्

नियुक्ति जुय धुनय् वं हे नेपः या सार्वभौमिकताता घः लाइगु काथं जि.ए.म.आर. कम्पनीयागु मेगु कम्पनी नपांया सम्भौताता बोर्ड बैठकं समर्थन याकय् ब्युगु खः । विदेशी बैंक व वित्तीय संस्थात नेपालय् सेवायाय्गु तातुडः लाय् छ्य वइगु मखु कि गथेयाःसा आपसे अपः लब नय फैं धाय्गु मति तयो वैगु खः । अमिसं म्हवचा लाय्छ्यल न्ह्यगु पुस्ताता गाक सम्पति कमय् याय्गु व नेपः या शासनय् बेक्वय्कः थःगु लिचवः अपलं लाकः शासन यन्त्रता थःगु जालय लाकय्ता वैगु खः । साम्राज्यवादीपिनिगु आर्थिक ज्या भः काथं वयो च्वंगु एशियाली विकास बैंक, विश्वबैंक, अन्तरराष्ट्रिय मुद्रा कोषं अःतक लाय्, वहे तातुडः छ्यलः च्वंगु दः ।

आर्थिक रूपं कमजोरेगु देशता अमिसं तःगु सर्त मन्यंतलय् अमिसं ऋण तक नं बिइ मखु । दे हे अमिसं छपला छपला याडःथगु लाहातय लाकः काई । अलय नेपः दे थजगु अल्पविकसित देशतय्ता ऋणया जालय् लाकः शासन अमिसं धः थें याकी । श्वहे नवउदारवादी नीति खः । उकी का. रोहित जुं धायो दी - 'नवउदारवाद आक्रमक पुँजीवाद खः ।' पुँजीया चाक् खय् भुंकः छुं नं देशया प्राकृतिक स्रोत व साधनय् बैंक व वित्तीय संस्थाया लिधंसाय थःगु लाहातय लाकय्गु हे अमिगु तातुना खः । नेपः या सरकारं छु ई न्हयो उदयपुर सिमेन्ट उद्योग नपां गुगू उद्योगत निजीकरण याय्गु निर्णय व अःतिनि धरहरा, भ्नापाया टावर नपां निजी लागाता जिम्मा वियगु कुतः नवउदारवादता छ्यलय्गुया कथहँ खः । थजगु खाँ साम्राज्यवादीपिनिपुं भिंपुं दलाल शासकपिसं गुब्ले थुइकिगु ?

लगानी बोर्ड ऐन नेपाल साम्राज्यवादी तय्गु भिंपुं व बांलागु

बजार दयकेगु वैधानिक आधार जूगु दः । उकिं नेपःया सांसदपिनिगु अधिकार कताड ब्युगु दः । थुइकः वा मथुइक उब्लेया संविधान सभाया अपलं दुजः पिसं साम्राज्यवादी पिनिगु इच्छा पू वांकय्ता संसदय् पिठवगु उगु विधेयकता समर्थन याता । अः संसद स्वयो नं लगानी बोर्ड बल्लागु व अधिकारं जःगु जूगु दः । अरुण तेस्रो, माथिल्लो कर्णाली, बुढी गण्डकी, पश्चिम सेती, अरुण तेस्रो व चौथो, तिला १ व २ थजगु महत्वं जःगु खुसीत फुक्क भ्नीपुं शासकपिसं लगानी बोर्ड निर्णय याडः भारतीय थी थी कम्पनीतय्गु लाहातय लः ल्हाय्गु ज्या याड वगु दः ।

नेपः या ब्वनामिपुं लाखै म्हा स्वयो अपः च्वजाय्कः ब्वनाय्ता विदेशय् वाडः च्वंगु दः सा विदेशी विश्व विद्यालय पाखं अपलं कलेजत यें चाय्कः च्वंगु दः । अथेहे मेडिसिटी अस्पताल, ग्रान्डी थजगु तः तः हांगु अस्पतालत नं विदेशी लायखं हे न्ह्याक च्वंगु दः । श्व फुक्क लगानी बोर्ड ऐनं याडः हे नेपालय् छुं पां भुं मदय्क चाय्के फःगु खः ।

साम्राज्यवादी तय्सं देश थःगु लाहातय लाकय्ता दकलय् न्हपां थःता छिथें ऐन दय्के बिई । कानुनयाता कः घाडः हे अमिसं थःगु इच्छा पुवांकी । नेपालय् २०६८ सालय् दयकगु लागानी बोर्ड ऐन साम्राज्यवादी तय्सं ब्युगु सल्लाह काथं दयकगु सिइके थाकु मजु । नेमकिपां यागु पटक पटक विरोधं याडः हे उगु विधेयक संसदय् हछ्याय् थाकुयो च्वंगु खः । अः लगानी बोर्ड ऐन देशघाती सन्धी सम्भौता याय्ता शाशक दलतय्ता खुँयाता स्वन्हँ धानय्गु थें जूगु दः । अः जूगु लिचवः स्वयबलय् उब्ले नेमकिपां कःगु लाँपु हे तः लागु सावित जूगु दः ।

अपाङ्गता जूपिन्ता विशेष प्रविधि व व्यवस्था यायूमः



उप प्रमुख रजनी जोशी

६४,५७८ खय् मुक्कं ६,४७, ७४४ म्हा मध्येखय् छगू नं छगू काथंया अपाङ्गता दयो चवंगु खानय दः । मुक्कं मिजपु जनसंख्याया २.५ प्रतिशत व मिसातपाखय् २० प्रतिशत अपाङ्गता खानय् दः । अपाङ्गता जूपुं मक्कं मनूत मध्ये मिजपुं ५४.२ मिसात ४५.८ प्रतिशत दः ।

देया मूक्क जनसंख्याया २.२ प्रतिशत मनूतय्के छगू नं छगू काथंया अपाङ्गता खानय् दः । जनगणना २०७८ काथं खवप नगरपालिकाय् १.३ प्रतिशत मनूतय्के छगू नं छगू काथंया अपाङ्गता खानय् दः । अपाङ्गता जूपुं मिजंतपाखय १.३ व मिसातय् पाखय् १.२ प्रतिशत खानय दः । जनगणना न्हय्सलय १२ ताजिया अपाङ्गता दःपुं मनूत दुथ्याक तःगु दः । थुकी शारीरिक अपाङ्गता, म्हवचा जक खानिपुं, मिखा मखांपुं, खवार्यपुं, मनोसामाजिक अपाङ्गता, म्हवचा जक ताइपुं खवार्यपुं, नपां मिखा मखानिपुं, मानसिक व मनोसामाजिक, बौद्धिक अपांगता (हेमोफिलिया) अनुवंशीय रक्तश्राव, अटिजम व बहु अपाङ्गतात धायो चवंगु खः ।

अपाङ्गता जूपिनिगु दकलय तः हांगु समस्या अमिगु म्हासिइका खःसा वनलिं अमिगु पहुँच खः । अपाङ्गतायाता उथेंगंयंक मौका बियफःसा, थुकिता धात्थेखः धाय्गु मतिं स्वयंफःसा सब्लाङ्ग थें अथेधाय् व स्वयो अपः व्यवस्थित याडः यंकय् फःसा न्ह्यागु नं पंगः त चिइकः वानय् फै । अपाङ्गता तः ता जि हे दः । छता छताजिया अपाङ्गताया लागिं विशेष प्रविधि व व्यवस्था मयासें मगा । फुक्कसिया थुखय् पाखय् मन क्वसायके मः । छगू छगू थाय्

अपाङ्गता जूपुं मनूतय्ता अमिगु हक अधिकार पक्का याय्ता, जनमानसय् चेतना ब्याकय्ता, अमिगु म्हासिइका, आत्मसम्मान व स्वाभिमानता हलिमय च्वजाय्केता सन् १९९२ निसें अन्तर्राष्ट्रिय अपाङ्गता दिवस डाय्क वगु खः । थौया दिनय् थी थी ज्या इवः गोष्ठी व ज्यालीया ग्वसः ग्वई । समानता व मनच्वजाय्किगु नारात थवकी । दाच्छितक थजगु, सःथवयो च्वनयमः धाय्गु भिंम्ह्य ।

हलिमय ब्याक अपाङ्गता जूपिनिगु अधिकार धिसिलाक हछ्याय्ता सन १९७६ य् संयुक्त राष्ट्रसंघ सन १९८१ ता 'पूर्ण सहभागिता र समता' धाय्गु मू नारा ज्वडः अपाङ्गता जूपिनिगु लागिं अन्तर्राष्ट्रिय वर्ष काथं डाय्केगु क्वः छित ।

सन् १९८३ सं राष्ट्र संघ अपाङ्गता जूपिन्ता मौका, उथिंयंकय्गु (समानीकरण) पुनस्थापना व रोकथाम याय्गुलि बःयासे अपाङ्गताया खार्यँ दसबर्ष विश्व कार्ययोजना पारित यासे छ्यला । थुकिता हलिमय ब्याक छयय्केता सन् १९८३ निसें १९९२ तकया ई याता अन्तर्राष्ट्रिय अपाङ्गता दशक दक क्वः छिता ।

सन १९९२ खय् उगु अपाङ्गताया

हिदाया विश्व कार्ययोजनाता छ्यलय्ता नपां धिसिलाक गुलि हज्याय फता धाय्गु वयो वहे दार्यँनिसें डिसेम्बर ३ ता अपाङ्गता जूपुं मनूतय्गु अन्तरराष्ट्रिय दिवस काथं क्वः छिड हलिमय ब्याकः डाय्केगु यात । नेपालं नं सन १९९३ निसें दार्यँ दार्यँ पतिकं ज्या इवःत न्ह्याकः थुगु दिवस डाय्कः वगु दः । सन् २०२४ या अपाङ्गता दिवस ३३ कगु अपाङ्गता दिवस खः ।

अपाङ्गता जूपिनिगु ३३ कगु दिवशया अन्तरराष्ट्रिय नारा 'Amplifying the Leadership of Persons with disabilities for an inclusive and Sustainable future' धःगु दःसा राष्ट्रिय नारा 'समावेशी तथा दिगो भविष्यको पुर्वाधार अपाङ्गता भएका व्यक्तिहरूको प्रबल नेतृत्व यसको आधार' तयो तगु दः ।

जनगणना २०७८ य् ल्या क्यडः तःकाथं नेपालय् मुक्कं ६६,६६, ९३७ परिवार दः । थुकिमध्ये ५, ५९, ८३० परिवार (८.४ प्रतिशत)य् छगू नं छगू काथंया अपाङ्गता जूपुं परिवारत च्वडः चवंगु खानय् दः ।

नेपः या जनसंख्या २,९९,

सच्छिबत स्वीच्यागूगु खवप पौ. ब.छि पौ(पाक्षिक)

अपाङ्ग मैत्री काथं दय्के मः । थुकी खवप नगरपालिकाया ध्यान साल च्वंगु दः । नगरपालिकां दानिगु छुं नं थासय् अपाङ्ग मैत्री याय्गु कुतः जुयो च्वंगु खाँ थाना ब्याकः च्वडा ।

दायँ दायँ पतिकं नेपाल सरकारनपां थी थी सरकारी व गैरसरकारी संस्थातयसं अपाङ्गताया लागिं थी थी ज्या इवः त ग्वसः ग्वई । थ्वहे इवल्य् खवप नगरपालिकां वांगु दायँ निसँ अपाङ्गता दिवस मानय् याडः वगु दः । खवप नगरपालिकां याडः वगु अपाङ्गताया ज्या इवः तः छसिकाथं थथे दः ।

- खवप नगरपालिका दुनयया अपाङ्गता जूपुं मनुतय्ता इडागु म्हासिइकापौ थुगु समिति वगु आवेदन काथं चिकित्सकनपांया पुत्रः पाखं परीक्षण याडः म्हासिइका पौ इडागु ।

- खवप नगरपालिका दुनयया अपाङ्गता जूपिनिगु तः मुंज्या, मुंज्या, स्वास्थ्य शिविर नपां अतिरिक्त क्रियाकलापख्य् धःप

तछ्याय्गु किपा च्वज्या क्वचाय्कागु, गुकि तः लापिन्ता मेडल, दसिपौ लः ल्हाडागु । - अपाङ्गता जूपिनिगु दश्वी वास्केटबल कासा ब्वज्या ।

- अपाङ्गता दिवशया लसताय अपाङ्गता जूपिन्ता ऊन (तर्यँ) या गलबन्दी तपुली व थर्मस इयगु ज्या ।

- अन्तर्राष्ट्रिय अपाङ्गता दिवशया लसताय खवप नगरपालिकापाखं यागु कासाया धिंधिं बल्ला पाख्य ख्वायँपिनिगु लागि ब्वाकः वानयगु कासा (एथ्लेटिक्स), खिप लुयगु (Tug of war) (हिं खुदां च्वयया ख्वायँ

हलंज्वलं तः Air Mattress, वाकर, तुइगु कथि, हाकु चस्मा, वैशाखी (तुतां), ट्वाइलेट चियर थजगु सामग्री इयगु ज्या ।

- खवप नगरपालिका दुनयया अपाङ्गता जूपिन्ता व संरक्षकपिन्ता नेलाया लाहातय ज्या दैगु हस्तकला सामग्री दय्केगु तालिम ।

- खवप नगरपालिका दुनयया अपाङ्गता जूपिनिगु स्वास्थ्य परीक्षण (न्हायँ, न्हयपः घाँटी मिखा व हाडजोनीं) या स्वास्थ्य शिविर ।

- खवप नगरपालिकाय् अः तक अपाङ्गताया म्हासिइका पौ काय् धुपिनिगु ल्या थथे दः ।

मिजंगु	मिसात	मुक्कं	पूर्ण अशक्त (हयांगु कार्ड)	अति अशक्त (वाँचुगु कार्ड)	दथुइया मध्यम (म्हवसुगु कार्ड)	सामान्य (तुइगु कार्ड)
३७७	२८५	६६२	१००	३४३	१६५	५०

पिन्ता) व एथ्लेटिक्स (बौद्धिक अपाङ्गता व सुस्त मनस्थितिपिन्ता) ग्वसः ग्वगु ।

- अपाङ्गता जूपिन्ता व अमि अभिभावक पिन्ता निःशुल्क स्वास्थ्य शिविर नपां अपाङ्गता जूपिनिगु पहः स्वयो मः काथंया

(अन्तर्राष्ट्रिय अपाङ्गता दिवशया लसताय खवप नगरपालिका या उपप्रमुख नपां अपाङ्गता जूपिन्ता म्हासिइका पौ इयगु ज्याया अस्थायी समन्वय समितिया कजि रजनी जोशी मंगलबार बियो द्युगु न्वचूया भाय्हिल - सं.)



नियेबेलय् वड्गु लितँसा

१. लितँसा रचनाया खँगवः वस्तुया आकार प्रकार कथं थीथी दु ।

२. थन आः उप्वः छ्यलाः वयाच्वंगु गवः > गव > गः दु । श्व छसीकथं ब्वना वने । गः - भूगोल गोलया हे गः खः ।

२क. पुरा गवःलाः कथं ब्वनेगु इवल्य्

२क१.क गः - नसाय् लालमन, रसवरी, लडडु आदि खःसा खाः गुच्चा, भकुंग्वारा (भतिंग्वारा) गः च्वना हे छगः निगः धकाः ल्याखाइ ।

२क२.ख खाइसि, भूमिसि, पासि, भोगत्या, धालय, आमासि, सन्नासि श्व भतिचा पक्किंसां गः छ्यलाः निनिइ । दकले तःगवःगु फसि, फँसि, अले चीगवःगु बुबलय् - चना, भुति, मुस्या, कय्गु, इसि, कबिस, चाकुमाकुसि, मर्प्यासि (मन्ताप्यासि) । अथे हे दकले चीगवःगुलि - तू, इका, पःका, हाम्वः, पाछैतू, साकेचातू, सतवसि आदि गः च्वनाः हे निइ ।

२ख. आकार गव मलाःसां भूसिं छगः, निगः धकाः नियेगु तरकारी थथे खः इस्कुस, प्वलचा, दुप्वलचा, तुसि, आलु, प्याज, ककःचा, गोलभ्यारा, मल्ला, तःगवः मल्ला, चत्तेल, करेला, बरेला ।

२ग. लं आदि फियेपुनेया भ्वलय् - तपुलि, सुरुवा, लंच छगः निगः हे जुइ ।

२घ. थलबल (चाया, धातुया, खाःया) गुगु दुने खालि जुयाच्वनिइ व वस्तु निइबेलय् गः हे छ्यलावइ । गथे - भ्यगः, सली, गवंप, धंप, त्यप, कसि, हासिचा, चाभाजं, फ्वसि, कसरी, तसला, बाता, घः, आम्बोरा, करुवा, ताँफ, दाला, पिचा, भकारी, सुतागः ।

छुं वस्तु (थलबल) कथं ल्याखाये थाय् नं दु । गथे - छगिलास लः, लः छधंप, छपवसि जाकि, छबोरा बजि, छदाला आदि ।

२ड. हाकः ताहाकः सां घेरा जक गवःलाः कथंयागु वस्तु पंथ (पं) खः । श्व नं छगः निगः यानाः हे निइ ।

२च. अथे हे पूर्वरूप गवःलाःगु लिपा ज्याभलं छायाः प्यकुंलाःगु वस्तु धलिं खः, गुगु छगः निगः धकाः ल्याखाइ ।

२छ. छप्ति हे गवः मलाःसां छगः निगः धकाः दराज, सन्ह, कन्तुरयात छयलिइ ।

२ज. मोटर, मोटर साइकलयात छगः निगः धकाः छ्यः सा साइकलयात छगू निगू धकाः ल्याखाइ ।

२झ. ल्वहं गवः-शालिग्राम छगः, निगः, स्वंगः ।

२ञ. गवः धेवा - धेवा छगः, निगः, स्वंगः ।


३. छि (छै) छयात ब्वने

३क. वस्तु खँगवःया नामं निइमाःथाय् छपतिं, निपतिं । पुतु - छपुतु, निपुतु, स्वपतु । पुसा - छपु, निपु, स्वपु जुइ ।

३ख, सन्नासि, आमासि आदिया पु छपु निपु जुइसा मेगु बिस्कं ब्वनेथाय् वःसिपु (बस्पति) व आम्लिपु (च्याम्पति) धाःसा छगः निगः याना ल्याखाइ । केपू छगः निगः धाःसा केपुपु जुलकि छपु निपु जुइ । श्व अपवादया रूप्य्

कायेछिं ।

३ग. छला (लच्छि), निला, स्वला धकाः छयलिइ । लायात लय् कथं छयलावःगु दु । गथे - लय् लय् पति आदि । दच्छि, लच्छि श्व छ जुयाः हिलाया न्हिच्छि, चच्छि । चच्छिं छस्वा, छचा जक चाहिनाः वा च्याचा गुन्हु लाक्क चाहिले मते । श्व आपा याना घःया जात्राय् जुइ ।



सच्छिव स्तीच्यागुगु स्वप पौ. बःछि पौ(पाक्षिक)

४. निगूया ज्व श्व ज्वः बखुं छज्वः, चखं छज्वः श्व प्राण दुपित छयलिह । प्राणहीनयात नं छयलिह गथे -तप छज्वः । ज्वः नं बाल धाःसा छपा धकाः धाइ । तप छपा तन । ज्वःया अर्थ जु नं खः । गथे - वसः छन्, लं सुर्वा छजु, लाका छजु, मोजा, पंजा श्व फुक्क छजु हे धाइ ।

५. पा (ह्रस्व) (पा)या भवलय छपा निपा याना निनिड । गथे अप्पा, किया, बर्खुपा, म्हयखापा, आयुपा, चिक अप्पा आदि । मरिया भवलय स्वारी, मार्पा, सेल, पुरी, चतामरि, छचमरि आदि पा तया निनिड ।

६. पा. (दीर्घ) - लप्ते, भ्वं न्हायक, भयाः आदि छपाः निपाः

७. पाँय् - लापाय्, सैपाय, स्वपाय, हिपाय, छपाँय् निपय् जुयाः ज्यलाचवंगु दु । छ्येय् ज्या पाँय् पाँय् ।

८. प्वः-प्वः लितँसाय् छप्वः निष्वः जुडा गथे दुरुप्वः, वसःप्वः, खाइप्वः, हाप्वः आदि ।

९. पं- भ्वप, कापिपं, सफू छप निप जुइ ।

१०. प्वाँय् - ताः चाप्वाय्, सुप्वाय्, छप्वाँय् निप्वाँय् ।

११. पु - पुसा छपु निपु स्वपु जुइ ।

११क. अथे हे हाकलं जूसा नं छं वस्तु दुसा उकिइ पुवइ । उकिइ छपु निपु च्चनिड । गथे - इताः, धुपाँय्, धुं, मुलु, नत्, सिन्का आदि । अथे हे गा, सुका, इजार, गलबन्दी, जनी अले लें आदि नं छपु निपु यानाः निड ।

११ख. भाववाची भ्वलय् नं पु वयाचवंगु दु - खंपु छपु निपु । चिनाखँ, बाखं छपु निपु ।

११ग. पँया चिधंगु रूप न्हायपं कथि (नःप), तिं कथि जक नं छपु निपु जुइ ।

११घ. छगूयात हे पा, पु नं गः नं छयःगु दु -

मिखा छपा मिखा छगः

तुति छपा तुति छपु

ल्हाः छपा ल्हाः छपु

१२. आः खँवः नियेबेलय् वइगु थीथी ताजिगवःयात छसीकथं न्हयबवये ।

क. - छकः, निकः, स्वकः ।

कले - छकले, निकले । सु स्वकले हकि, छ्वालि निकले जक हकि ।

कुं - छकुं, निकुं ।

कु - भारी छकु, निकु ।

कृति - छकृति, निकृति, स्वकृति । पाःताः छकृतिं छें दन ।

कुलां - छकुलां मजाः ।

कू - ला छकू, निकू, क्वथा छकू, निकू ।

क्वला- क्वलाछि, निक्वला, स्वक्वला ।

क्वा - छक्वा, निक्वा, स्वक्वा । पसःक्वा छक्वा बालं कया थां क्वा निक्वा वयागु भाग ।

ख - छखँ, निखँ । जा छखँ नयावन ।

खा - छखा, निखा, स्वखा । छें छखा मिया छ्वया ।

छखा, निखा, स्वखा । छें छखा मिया छ्वया ।

ख्वाय् - पलाःख्वाय् छ्वाय्, निख्वाय् ।

गथिः - छगथि, निगथि, स्वगथि ।

गाः छगाः, निगाः, स्वगाः । स्वगाः गाः म्हुये ।

गाजः लाभा छगाजः, कःनि छगाजः ।

गुजि - छगुजि, निगुजि । पर्सि छगुजि मगाः ।

ग्वारा-छग्वारा, निग्वारा, स्वग्वारा । चाकु स्वग्वारा अन दु ।

घुसु - छघुसु, निघुसु, स्वघुसु ।

घौ - छघौ, निघौ । स्वघौ लिपा वा ।

चकं - छचकं, निचकं, बाचकं ।

चा (चच्छि)- छचा, निचा ।

चिलं- छचिलं, निचिलं, स्वचिलं । बभां छचिलं साल ।

छाः-जा छछाः निछाः जुइ ।

भाःछभाः, निभाः । वं छभाः कविता नं चवः ।

भवः-छभवः, निभवः । स्वभवः भव्य नके सिधल ।

ता - वसता छता, निता, खं छता निता । खं छता कने यःसा मरि छपा चुई ।

ति - छति, निति । सुकाति छति हे तये मसः ।

तिकि - छतिकि, नितिकि । छतिकि हे लः मवः ।

तुजः छतुजः, नितुजः, स्वतुजः ।

तुलु - छतुलु, नितुलु ।

त्वा-छत्वा, नित्वा, स्वत्वा । सुका छत्वा ।

थाय् - छथाय्, निथाय्, स्वथाय् ।

थि - छथि, निथि, स्वथि । थौं स्वथि तरकारी दयेका ।

थु - छथु, निथु वाउँगु तरकारी, छ्वालि, सुयात छयलिह ।

श्वः छश्वः, निश्वः, स्वश्वः । थौं वं स्वश्वः प्याखं स्वल ।

दु (महदु दायें)- छदु, निदु, स्वदु ।

द्या-छैया द्या, छद्या, निद्या ।

द्वं - छद्वं निद्वं । वा छद्वं अन दु

धाः - छधा, निधा, स्वधाः ।

धू- छधू, निधू । इताः छपुं न्हयधू चाः ।

धे- छधे निधे । कःछयें छधे, काछ्या भेद बकुलाधे, मीकःछेंधे,

कः निधे, स्वाको सिमिधे ।

ध्या - छध्या, निध्या, स्वध्या। ग्रन्थया छध्या, निध्या बाखं कन ।

ध्वः - छध्व, निध्वः स्वध्वः किये धुन ।

सच्छिबत स्तीच्यागूगु स्वप पौ. बःछि पौ(पाक्षिक)

न्हू- दिनया पर्यायवाची । छन्दु, निन्दु, स्वन्हू
न्हू - वसः हियेबलय् छ्यलिङ्गु । छन्हू, निन्हू ।
पला. - छपलाः, निपलाः स्वपलाः ।
पात - छापात, निपात, स्वपात ।
पुस्ता - छपुस्ता, निपुस्ता, स्वपुस्ता। न्यापुस्ता पात ।
प्यः - जाप्यः छप्यः, निष्यः ।
प्लाः - मत छप्लाः, छवालि छप्लाः, निप्लाः, स्वप्लाः ।
फँ - छफँ, नि कॅरा छफँ, स्व छफँ ।
फला - छफला, निफला, स्वफला। सिं छफला फाये ।
फि - छफि, निफि । तुफि छफि न्यानाहिं । धू छफि थानाचवन ।
फत्र - छपत्र, निष्वः स्वपवः । स्वां छपवः ज्वनावल ।
व - छव, निवः । स्ववः दुगु गा न्यानाहिं ।
बाः(ल) छि- बा.छि छकः पिहां वनि ।
बाःति रति - (छगू लाल) या बच्छि । गथे बार्ति ज्या याये मखु ।
बा - बच्छिया अर्थय् बा-बाबु वन । जा बाभु ति ।
वाज्य- बाम्ह । बाम्ह सिक्क ज्या याये । स्व, सिङ्ग वाज्यः वम्ह मन्
(वयस्क मखुत) । बास्ता - अय्ताछिया बच्छि (वाचक्या बच्छि)
व्वः छव्व, निव्व, स्वव्व ।
भना - खप भासय् भनं वड् । छभनासं, निभनासं, स्वभनासं
द्यक्के बना वया । थव यमि भासय् मद्दु ।
भी - सन्त्रास, भम्मिसिया सिसाबुसाया छगः निगः जुइसा थुकिया
कुचा सन्त्रासि छभी, लाभा छभी न्हिथं नयेगु स्वस्थकर जू भी
जुइ । गथे भी मदय्क छभीगु लाभायात यभि लाभा धाड् । थव
गवःलाड् । थुकियात छगः, निगः छ्यलिङ्गु । यभि लाभा छगः ।
लाभी बाये धकाः भीगु म्हाय् तसकं स्याङ्गु दु ।
भे - ग्वाःयात छभे, निभे धकाः निनेगु याड् । तर पुलां भासय्
सच्छि व च्यापात ग्वाल धकाः छ्यलातल ।
मना - छमना, निमना ।

मा- मोतिमाः, सिखःमाः, स्वांमाः, सितुमाः । थव छमाः, निमाः
याना निनिङ्गु ।
मा - वनस्पति (मा) । गथे सिमा, स्वांमा, घाय्, लहरा आदि
छमा निमा छ्यलिङ्गु ।
मात्रा छमात्रा, निमात्रा, स्वमात्रा । वासः छमात्रा नया ।
म्वः छम्वः, निम्वः, स्वम्वः । पर्सि छम्वः, निम्वः । पायम्वः
छम्वः ।
म्हू - छम्हू, निम्हू, स्वम्हू । गथे जाकि छम्हू, गव्य् छम्हू, पाछै
छम्हू ।
यः - छयः, नियः, स्वयः । छयः बजि नया ।
लांगू - छलांगू, निलांगू ।
लि - छलि, निलि, स्वलि । (लि ३ तुति) प्यलिं प्यव्व थये ।
ल्लुकु - छल्लुकु, निल्लुकु । छल्लुकु तरकारी मुने ।
वाः छवाः, निवाः । स्ववाः चाहिला वा । पुलांगु म्ये छगू वार
न ज्यलाचवंगु दु । गथे - जि वया ला लछि मद्दुनि छि काय् सँ
भाये धाल छगू वार लिगना दिसँ न्हां ।
साः छसाः, निसाः, स्वसाः । कापः छसा कया हजि ।
सू - छसू, निसू । स्वसू अंगः दन । सुमिचां चिकं छसू छुये ।
१३. क्रियाय् नं नियेबेलय् वड्गु खँवः
गा (ल्हाये) - छगा, निगा, स्वगा । निगा कँगा ल्हाये । पा (पाये)
छपा, निपा, स्वपा । रंग छपा पाये
लु (लुये) - छलु, निलु, स्वलु । भैलःखः छलु लुये ।
सा (साले) - छसा, निसा, स्वसा । चुरस छसा साले । सि (सिये)
-छसि, निसि, स्वसि । लाभा छसि सिये ।
सु (सुये) - छसु, निसु, स्वसु । रन्दां छसु सुये ।
हिं (हिने) - छहिं, निहिं, स्वहिं । का छहिं ल्हाःतय् हिने ।
थुगु कथं खँवः नियेबेलय् वड्गु आपालं दु । थव न्हयःनेसं
चवंगु मुना तयागु खः ।

इणाप

खप नगरपालिका पाखं पिथाड् चवंगु स्वप पौ बः छि पौ खय् बांलागु चवसु
त बियो ग्वाहाली याड् दिसँ । उगु रचनाया ल्य ज्या याड् पारिश्रमिक बियगु
खाँ खप नगरपालिकाया २०७७ श्रावण २६ गते चवंगु बैठकं
क्वः छ्यूगु खाँ ब्याक चवडा ।

सम्पादक
रत्तप पौ

नेवः समाजया विस्कं नसा, योमारी

आशा कुमार चिकंबजार

‘वं स्व, श्वं स्व, थःगू ख्वः थमनं स्वः’ पुखां धायो तकगु द्यो बचं । नुगलय वायकः थुइके फःसा मन्त्र, मखुसा न्यन, कान, अथें, अथें नाः फुति थें बायें सं सुडः वानी, मत । अलय संस्कार-संस्कृति दुनय थःगु ख्वः गथे खानय मदै । धात्थें संस्कार-संस्कृति भीगु म्हासिइका खः । थुगु म्हासिइका हे तान धःसा भी गना ल्यनि । भी व चिकुबलय गागु प्वं थें लिभः त्वलकी न्याली, तानी । अलय पूखाया गुलिं ई बिकः नुगलं ग्वाकः दय्क-तकगु मूर्त अमूर्त सम्पदात च्वाप्व न्यें थें न्याल वानि । पलख बः वानि अलय श्व बँग्वाराया उब्जनी थाना सं तुसुडः वानि । गुब्लें चुलि जायो वय मफुक ।

जीवन ऋतुया च्यो भ्वातिं खः धाय् । ऋतुं पिता हःगु लकस दुनय भी फयो नं ल्वाडः च्वनयें, मफुं मफुं नं ल्वाडः च्वनयें । वहे प्रकृतिनपां या ल्वापू खय् ल्वाय्गु स्यल्लागु ल्वाभः वहे ई काथंया प्राकृतिक नसा ज्वलंत खः दक भी अजा-अजिपिसं क्यडः तकगु लौपु, स्यडः तकगु नःपा चःपा, तियगु तिसा वस फुक्क फुक्क सभ्यतां खसः च्वडः संस्कृतिया खाचा श्वकगु खः । गुकिता भीसं ब्वलांकय् फःसा ग्वंगः जूसा सुथाय् त्यलं हाय्के फैं ‘अलाम’ थें । माखा जुसा ख्यें छय्के फैं । बुदिं जूसां न्ह्यागुं भिं ज्याखय् ख्यें सगं काय्ता ज्या वै । उगु संस्कृति दुनय गनां गनां हे मभिया भौचां लौं त्यालौं कःगु खानय मरू, धात्थें हिलः माल’ स्वयगु खःसा ।



लय छगू नेगू नखा-चखा वै नेवः समाजया । थाकुक् बुईं ज्या सानय् मःपुं ज्यापु-ज्यामिया नितिं बिस्कं बःताडः नय्गु सायद उब्ले थाकु जुई । उकीं नखाया त्वहलय ला छक जूसां कायो नयता नखा - चखा दय्कगुनं जुयफ । अथेयां नखा - चखा पतिकं छता जूसां बिस्कं पहःया नसा त्वँसा मदै हे मखु । व फय, लिभ, तःनु

मैया त्वःन दायकिगु चलन धः सा ताडः हे वान धः सां ज्यु । थुब्लेनिसें जक त्वःन खुडः तः खा (ख्वाँला) दय्केगु याडः हैगु नं मौशम काथंया ज्ञान हे खः ।

सकिमा पुन्हीया कन्दमूल, बुबः नय धुंक्, वैगु नखा मध्ये योमारी पुन्ही हे खः । थुगु नखा नेवः जातिया बिस्कं पहः या नखा खः । थिला पुन्ही, धान्य पूर्णिमा योमारी पुन्ही न्ह्यागु हे धःसां थुगु इलय लक्ष्मी पूजा याडः तःगु वा क्यलः जाकी दय्क, जाकी क्यल, पोचुं दय्कः योमारी छुडः नैगुलिं थुकिता - न्ह्यु सामा वगु या लसताय् डाय्कः नैगु नखा व मेपिनि काथं न्वागी (नुवागी) दक नं धः ।

योमारी छुय्गु नेवः तय्गु थःगु हे पहः दः । पोचुं (जाकी चुं) क्यलः हयानिं छुचुं क्वागु नाः खं (गनां) व नाः तयो छुचुं न्ह्याई । वहे छुचुं चिकुयो तज्याई धायो कापः व रूमालं तपुयो तै । अलय थः ता मःछि बःक्वचा याडः क्वचा थयो नेपा

लाहातं च्वका दय्क म्हालापातिंचां सुयो मेगु पातिंचां पचिपचि यायां योमारी दथी खाली याडः ग्वः लाक दय्की वहे दथी खालीगु थासय् चाकु तयो योमारीया क्वय (प्यं धाई) पाखय् ग्वः मुंः मुंः चाकुयाता दुनयलाकः प्वः तिई । क्वय च्वामुकसा बायो (ब्वाम्हा) योमारी व पाचा चिकः सिमा पालिगु पाँ थें ज्यासा मायो (मांम्हा) योमारी काथं दय्की । बायो योमारी दय्के सः पिसं अलय मायो योमारी न्ह्युं सिकारू पिसं दय्किगु नं जुयमः छाय् धःसा मायो योमारी दय्के उली थाकु मजु बायो योमारी

सच्छिव स्तीच्यागूगु स्वप पौ, बःछि पौ(पाक्षिक)

थें । बायो योमारी दय्के धुकः पोतासी फोसी चाय् देनयें देछुडः फोसी चाखय् नाः तयो नाः क्वाकः उकिया हाँखं पोतासी दुनय्या योमारी बुकिगुलिं श्व हायो (हां बुक) नय्गु नसा मध्ये छता जि खः । पोतासीया क्वय प्वः प्वः दैगुलिं योमारी कुतें मवांकयता मलतामा भान्तामाया कछिचा पालाँ तयो उकिया द्योनय् योमारी तयो छुइगु चलन नं छताजि बिस्कं पहः हे खः । नत्रसा श्वें थुयता प्वःहाय्गु प्वहाइबलय् छुचुं लाजा चुं गनां दुसिचुंया म्हछ्यामारी हायो नैगु बाहेक मेगु उलि पोतासिखय् नेवः समाजय् हायो नैगु चलन खानय् मरु । मखुसा ऐला काय्बलय् कः खय्या हाँ खं द्बवचा तयो ऐला काइगु व चवः हिहाइगु बाहेक मेगु उलि हायो नैगु चलन मरु । हाँजा नं गुम्हां गुम्हां



सिया नैगु चलन दःसा अः भवय बलय् हाँजा थें हायो नकेगु चलन याडः हल ।

थथे योमारी छुइबलय् प्यख्यरं अथेधाय् चाकलीं मि मवांसा गुगु कुलानय् मि मगागु खः आना बिलाय् यो अथे धाय्गु मबुय यो दक थुगु इलय् छ्वः, छुसि मिजः लाइगु छुसि दुय्गु याई । अलय् पोतासीया जायँ हाँ प्याहाँ वै दक कापया टुक्रा खुडः नाखंप्याकः जाहिचा हिनिगु व चवय कसय् जुइक भ्योचां तपुयो हाँ प्याहाँ मवयक योमारी छुयगु याई ।

योमारी बुतकीं दकलय न्हपां सुजद्योता छाइगु चलनं अः निहँ (दिन) ताः हाड चा (रात) चिच्या हाइगु जुल धायो, थः याता लसकुस यागु खानय् दः ।

गुलिसिनं याईगु धर्म व कर्म नं उलि हे ल्वःगु खः । चिकुलाया चिकुं पुकः ख्वं थिइकः च्वंम्हा मनूया मनय् लिभः या आशा याइगु अस्वाभाविक नं मखु । उकिं हे साहित्यसं उकिया उपमा काथं द्यो तुइगु या सड्केत न्हूंगु दिनया आशा काथं कायो तःगु दः । खा (स्वंगः) हालिगु, चखुं बखुंया चिरिबिरी सलं ख्यँ नुड तुइजला सालिगु नपां पूर्वया कुलामं लुयो वम्हा सुजद्योता दरशन नाः ताड याइगु थें योमारी पुन्हीया योमारी दकलय न्हःपा सुजद्योता छाइगुलिं ख्यँ चिरिफायो तुइजला लुइगु अत्याचारी

ख्ययां धकीं खुडः स्वतन्त्रताया तुई जला ह्यमःगु खॉ जक गनां पुखां बेक्वयकः (बक्रोक्ति) धायो तकगु खःला ? मन मनं खॉ थुइक नखा नपां ज्ञानया लुखा नं चाय्के दःसा अजः बांलाई ।

साँखु पुन्ही खुनुं न्हि ताहाइगुलिं न्हिबिक ज्या सानय् मज्यू धाइगु व योमारी पुन्ही खुनु चा दकलय ताः हाक जुइगुलिं लिबाक देनय् मज्यूगु खॉ नपां थुखुनुं चवयया खॉ मन्यंम्हा मनूनं सुख सिइमखु धायो तक काथं नं स्वतन्त्रताया लुखा चाय्केता अलछी जुयमज्यू धायो तकगु दुजां थुइके फःसा बांलाई ।

लोक बाखं लोक साहित्य दुनयया छगू विधा मध्ये स्थल्लागु विधा खः ।

अजा-अजिं थः छय् छुई पिन्ता काँ कां समाजय म्वाडः च्वंगु लिपिवद्ध च्वयो मतःगु साहित्य लोक साहित्य खः । उकिया महन्व थुइकः गुलिं लोकसाहित्य विद्वपिसं अः अजगु बाखं, किम्बदन्ती, धापुत मुडः साफू नं पिकाल । अथे नं व थाय् काथं भतिचा पहः हिइकः कानिगु चलनं धःसां लोक बाखंया ख्वः भातिचा पाःगु खानय दः ।

न्यँ कँ बाखं काथं ख्वपय् छम्हा मनूया छँ जाकी मदयो थःमिसां गुब्ले निसें मुडःतःगु धेबा बियो वा न्याकय् छवत । वं व वा पलाँति वाडः न्याडः वा क्यलः

जाकी दय्कः जाकी क्यलः छुचुं (पोचुं) दय्कः डायो हे वाडः डायो हे वयो छँ थ्यंकः योमारी छुडः बुकानं द्यो तुइ मजुगु प्रशङ्ग स्वाय् है सा थिमि वा ख्वपया कुम्हः दाजुपिसं भाला छकु ज्वडः वाडः भालालिसें वा ग्ययो वा सुडः, कुतिवाडः जाकी चुकः, जाकी घटय्

क्यलः पोचुं याडः पलाँती निसें ख्वपय थ्यंकः डायो वयो योमारी छुडः नकानं द्यो तुइ मजुगु खॉ खं उब्लेया चा दकलय ताः हाकगु धाय्गु भौगोलिक ज्ञान बिय तांगु सिय दः ।

वहे योमारी छुडः सुजद्योता छायानिं गणोद्यो, कुमार (पिखालाकिइ) छायानिं थः परिवार व म्हयाय्मचा भेनामचापुं स्वयो ग्वःगः योमारी तय् माली वःगः बाताय् दालुखय तयो वा दःगु कुथिइ तय् यंकी । थुकीं सिय दः योमारी नेवः समाजय सामान्य नसा मखु । श्व द्यो, म्हयाय् मचाता नं नकय् मःगु धाय्गु नपां गनां गनां पितृता नं ब्व तयो त्वः जुं चा बियगु दक याः सां नं अः थथे यागु खानय

सच्छिव स्तीच्यागूग स्वप पौ. ब.छि पौ(पाक्षिक)

मरु थें च्वं । (दःसा जिं मसिल) उकीं योमारी लौकिक व पारलौकिक पात्रतयता अधेधाय् पित्त, द्यो व मन् तयता विशेष सम्मान याडः नकिगु नेवः समाजया विशेष नसा खः धाय् फः ।

उलिजक मखु बःन्हि योमारी फवडः नैगु चलन नं दः गुलि अः सालुयो वान । अथेन थी थी पुचलं संस्कार ल्यंकः तयगु काथं योमारी फवनयगु याडः वगु नं खानय् दः । थुगु इलय थाय् काथं हालः यो मारी फवनिगु नं खाडाः गथेकि-तियो छिं तियो

व्वकछि तियो
थाप्ले यायगु सामावल
योमारी नेगः तियो
व्यूसा ल्यासे
मव्यूसा सितिकृति ब्रुही

थुकाथं थाप्लेया सामा वगुया लसताय् दयकगु नखा काथं थजगु म्यँ न्यडः धाय्फः । अलय् खाँवः त अपभ्रंश जुयो 'त्योछिं त्यो, बोकसीं त्यो' धाडगु नं जुयो वल । धात्थेगु खाँवः ज्यायगु खःसा तियो छिं तियो - बियो दिसँ यो छिं, व्वकछि-फुक्क मिलय याडः धाय्गु काथं सिडके मालिथेच्वँ । अलय- यँ यल पाखय-

तियोछिं तियो, बोकछी तियो

लातापाता कुलय्चां जूछिं तियो ॥

जक धाडगु नं न्यडा । नपां योमारी च्वामु, उकिया दुनय हाकु व्यूसा माकु मव्यूसा फाकु धाडगु ने न्यानय् दः । थुकाथं 'व्यूसा माकु, मव्यूसा फाकु' धायो अड्गुर पं धःम्हा धवँ चाय्गु बाखंथे ज्वः लाक मव्यूसा फाकूगु खाँ खं छताजि ध्याचु दःसाँ 'व्यूम्हा ल्यासे मव्यूम्हा सितिकृतिम्हा ब्रुही' जक सुवः बियो भिं म्हुडगु नं खानय् दः । उकीं सभाया

अन्न सयकगु मेपिन्ता नं इडः नकय्गु सामाजिकीकरणया छगू नखा काथं नं योमारी पुन्हीता काय् छिनिला ?

योमारी पुन्हीया तिमिला शरदया मिलार्थे चकानिगुलिं थुगु इलय्या तिमिला स्वस्वं चुक, ननि, बहा, वा कःसि च्वडः तिमिला स्वस्वं मचातयता तिमिला या बाखं, म्यँ न्यंक न्यंक योमारी नैगु नं चलन दः । अलय थुब्ले द्यो तपुयो तिमिला सु च्वंसा व लुकुबिडः च्वंसां मचातयता उकिया अर्थज्याडः अजा-अजिं बाखं दयकः कानिगु मौलिकता धःसा अःमदयो वानय् धुंकल ।

थुगुइलय् खवपं भवँतय् च्वंम्हा धनेश्वर महाद्यो कय् चच्छि बिकः डायो द्योकय् वानिगु नं चलन अः तकः दनि थौ कन्हेया आधुनिक जमाना व आधुनिक सामानया छ्यलां धःसा योमारी छुय्गु ई, थालाबाला व पहः, बाना नं बुलुहँ हिलः वगु खानय् दः । मःम छुड्गु थालाखय् फोसी, पोटासी म्वाय्क अःपुक भालाखय् छ्यलिगु नपां चिच्या चिच्या ग्वक योमारी छुड्गु याड हल । अलय अः थी थी ज्या इवः सं विशेष पाहाँ व मूपाहाँ पिन्ता योमारी छुडः नेवः पहःया विस्कं सबया चाकु माकुगु योमारी नकिगु चलन दुस्वः बल । थव बाँमलागू यां धाय मछिं अथेन ऋतु पतिकया नसा हाकुं चायो वगु खाँ धःसा भतिचा बिचः याय् मालिथे च्वं ।

इन्धनया काथं म्हेग छ्वः, छुसी दुयो थःगु थाय्या इन्धन छ्यलिगुलिं अः ग्याँसय् ज्वरय् याड्गु जुल । अः पुसां नं कतया देशं हय मःगु ग्याँस नाकाबन्दीया इलय् नेपः मिपिसं स्यूगु दुःखलं ज्ञान काय्गु धःसा त्वतय् जिड्मखु । विकल्प करेन्ट नपां छ्वः छुसि नं गथे याडः आधुनिक

चुल्लो दय्के फँ धाय्गु बिचः नं बाँमला मजुइला ?

योमारी चाकु, उकिया दुनय हाकु धःसां अः योमारी दुनयँ चाकु जक मखु खुवा, चाकुनपां नैक्य क्वचा, हाम्ब नं तय्गु याः सां गनां काचिला तयो नं दयकगु खानय दत । अलय गनां कडासा, कय्गु घासा (समोसा) थें नं छ्यलयता सबः स्वयो हःगु नं खानय् दत । योमारी दुनयँ खालिगु लाःसा दसा मभिं धाड्गु नपां माकुसब नपां चाकु सबः मदैगुलिं नं धःगु जुई ।

अथेयां योमारी गुथि पः सिधैबलय् भतुजु जुक तानय् यंकिगु चाकु मरुगु प्यं चाकलागु योमारीया दुनय् जाकी नेगः जूसां तैगु नं दः । थी थी मचाबु कु तानय् यंकिगु कु खय् दय्किगु योमारीया नसा स्वयो बाना खः धाय् छिं । अः तुम्बचा (छगु प्रकारया माःखय् सैगु हाम थें च्वंगु) धःसा प्रदुषणं मदयो वांगु नपां मनूतयसं सिहे मसियो नं वानय् धुंकल ।

न्हायगु थःजु योमारीया सबः चाकु माकुगु योमारी चिकुलां जिउ क्वाकः बिड्गु योमारी पुन्ही दकलय् ताः हाकगु चाः अलय् योमारीया च्वका क्वछि न्हि ताः हाड्गु योमारीया च्वका ताः हाः सा चिकुला ताः हाड्गु (सायद च्वका ता हाड त्वः धुसा बाँमलाड्गुलिं नं जुयमः) थी थी खाँ नपां नेवः तय्गु थःगु बिस्कं पहः दःगु मौलिक नसा अलय् गुन्हिपुन्हि व पञ्जारां बलय् क्वाति नेकः दाय्कः त्वं थें योमारी पुन्हि व वाखु क्वकाइ खुनुं प्यन्हू लिपा कुथिं क्वकायो भाजनय् क्वाकः म्हाय्, भेंचा व्वडः नकिगु नखा दुनय् नेवः पहः दः थवः नेवः तय्गु थःगु म्हासिडका पिब्वयो च्वंगु नखा मधःसें मगा ।

**नगरपालिका भीगु हे संस्था खः
इलयहे करपुल ग्वाहाली याय्नु**

शैक्षिक प्रमाण-पत्र धितो तयो शैक्षिक ऋण

शाण्ठि तामाड

खवप नगरपालिकां चालु आर्थिक वर्षखय् १५१ म्हासिता शैक्षिक प्रमाण-पत्र धितोतयो शैक्षिक ऋण ब्यूगु जुल । नगरपालिका दुनय स्थायी बसोबास याडः चवंपुं विपन्न व जेहन्दार बवनामिपिन्ता शैक्षिक योग्यताया प्रमाण पत्र धितो तयो दांक (सहूलियत) ब्याज दरं ऋण ब्यूगु खः ।

चालु आ.व.सं दकलय अपः वडा नं. ४ या २२ म्हा सिनं ऋण कःगु खःसा दकलय म्हवँ ७ म्हा सिनं ९ नं. वडां कःगु खः । नगरपालिका शिक्षाया कजि रबिन्द्र ज्याख्वं धायोद्यू काथं शुक्रवार ऋणया खाँ ब्याकसेलिं तिनी ऋण वियगु ज्या न्ह्याकी । न्हपा यायगु दार्यं थें थुगुसी नं शैक्षिक ऋण काइपुं बवनामिपिनिगु नां पिकाय धुंकल । कजि भाजु ज्याख्वा जुं धायोदिल - “तप्यंक ऋण काइपुं बवनामिपिनिगु लाहातय् धेबा (ऋण) व्यूसा मखुथाय् छ्यलय् योगुलिं व बवनामि बवनिगु बवनय् कुथि/क्याम्पसय् स्वंगू किस्ता याडः क्याम्पसया खाताय् धेबा तयो बियगु खः।’ नगरपालिकां ध-काथं दार्यं दार्यं पतिकं शैक्षिक ऋण माला दक आवेदन बिइपुं अपःदयो वगु दः । अः तक नगरपालिकां ब्यूगु शैक्षिक ऋण न्हय्स व खुइन्हयम्हासिं काय् धुंकगु जुल ।

ऋण काय्ता याय मःगु ज्या

खवप नगरपालिकां ७५३ गू नगरपालिका मध्ये शैक्षिक ऋण ब्यूगु न्हपांगु नगरपालिका दक दाबी यागु दः । नगरपालिकां ऋण बियता भक्तपुर नगरपालिका शैक्षिक ऋण सम्बन्धी निर्देशिका ०७५ जारी यागु दः । शैक्षिक ऋण वियता २०७५ सालय हे नगरपालिकाया प्यकगु नगरसभां शैक्षिक ऋण निर्देशिका पारित यागु खः । निर्देशिका १९ वैशाख २०७६ या स्थानीय राजपत्रखय प्रकाशित यागु खः । वहे दार्यं निसें नगरपालिकां निर्देशिका काथं शैक्षिक ऋण ब्यू ब्यू वगु खः ।

निर्देशिका काथं शैक्षिक ऋण माला धाइपिसं वडा समिति माग पेशयाड सिफारि कायमः । सिफारिस नपां तयो नगरपालिकाय निवेदन वियमः । निवेदन स्वयो मेयर जुं शैक्षिक ऋण स्वीकृत बियफः । मेयर जु पाखं स्वीकृत याय् धुंक नगरपालिक आर्थिक प्रशासन शाखा पाखं ऋण रकम बिई । शैक्षिक ऋण कःपुं छम्हा छम्हासिं डागू लाख तका तक काय फैं । एसइई स्वयो चवय याय् पिसं विद्यावारिधि (पिएचडी)

याइपिसं तक ऋण काय् फः ।

स्वीम्हासिं शैक्षिक ऋण पुलय् हल

शैक्षिक ऋण कःपुं मध्ये स्वीम्हासिं पुलय हःगु जुल । सुनं बवनामिपिसं जरिवाना (बं) पुलयमःगु मरुनि जक नगरपालिकां धायो चवंगु दः ।

जिमिसं बियागु शैक्षिक ऋण बुलुहुँ बवनामिपिसं पुलय हयो चवन । अःतक छम्हासिं हे जरिवाना पुइके मःगु मरुनि - ज्याख्वः जुं धायोदिल ।

वयक धायो द्यू काथं नगरपालिकाया थुगु ज्याखं जेहेन्दार व विपन्न अपलं बवनामिपुं भिंजगु दः ऋण काइपुं नं भन अप्वया वगु दः । निर्देशिकाय् थयं मथयं सच्छिम्हासिता जक ऋण बियगु धःसां दार्यं दार्यं पतिकं ऋण काइपू अपः दयो वगु दः ।

शैक्षिक ऋण मपुसा नगरपालिकां बिइगु सेवा बिइमरु

बवनामिपिसं शैक्षिक सत्र क्वः चगु मेगु दार्यं निसें ऋण पुलय याय् मः । निर्देशिका काथं शैक्षिक वर्षया अन्तिम परीक्षा व्यूगु दच्छिया दुनयं ऋण रकमया प्यबवय छव (२५ प्रतिशत) पुलय मः । कोर्सया अन्तिम परीक्षा ब्यूगु न्हिल्याखं स्वदाया दुनय ऋण कः गुया म्हवचा खयनं प्यबवखय् स्वव (७५ प्रतिशत) सावाँ व्याज असुली जुई । अन्तिम परीक्षा ब्यूगु न्हिल्याखं प्यंगु दाँ दुनय् फुक्क ऋणया साँवा ब्याज चुक्ता याडः पुलय मः।

उगु ई दुनय सावाँ ब्याज मपुसा पुलयमःगु सावाँ ब्याजया डागु प्रतिशत हर्जाना पुइक बवनामि व वयागु साक्षी चवंपु परिवारया दुजःपिन्ता नगरपालिकापाखं विइगु सेवा मविइगु खः । शैक्षिक ऋणया दार्यं व्याज ६ प्रतिशत जक खः । अलय प्यदाया कोर्स जूसा उकिया मेगु दार्यलिसें ब्याज पुलय मः । बवनामिपिनिगु बवडः चवंगु ई तकखय् ऋण पुलय म्वः । वयकं धायोदिल - शैक्षिक कोर्स सिधःगु प्यदातक ज्या साडः ऋण व ब्याज (साँवा ब्याज) पूसांजिल । ज्यदातक नं कःगु ऋण पुलय महःसा जरिवाना नपां मा व ब्याज (सावाँ ब्याज) पुलय माली ।

(नयाँ पत्रिका मंसिर १३ गते)

खवप नगरपालिकाया ज्या भवः त

पूर्व उद्योगमन्त्री अनिल कुमार भा खवपय्

मंसिर १३ गते



खवप नगरपालिकाया प्रमुख सुनिल प्रजापति व पूर्व उद्योगमन्त्री अनिल कुमार भा खवप नगरपालिकाय् नपालाडः दिसे खवप नगरपालिकाया शिक्षा, स्वास्थ्य विकास निर्माण व देया समसामयिक विषय खँहाबल्हा याडः दिल ।

खवप नगरपालिकां यागु 'विकास मोडेल' या खँ न्हिथांसे पूर्व मन्त्री भा जुं न्यड, दयूगु न्ह्यसः या लिसः बियो दीसे नगर प्रमुख प्रजापति जुं जनप्रतिनिधि जु पिन्के जनताया सेवा याय्गु भावना, कर्मचारी व स्थानीय जनताया छगूंतुं मतिं ज्या साडागुलिं थथे जुय फःगु खः धायोदिल ।

मन्त्री भा जुं खवप नगरपालिकां चाय्कः तःगु खवप अस्पतालं जनताया बांलागु सेवा याडः चवंगू खँ कुलः दिसे रौतहटय् मेडिकल कलेज चाय्केगु तातुडः १६गू विघा जग्गाय् १०० गू शय्या गजेन्द्र नारायण सिंह अस्पताल चाय्कागुलि चिकित्सकपुं ह्य मफयो बांलाक हछ्याय् मफायागु खँ काडः दिल ।

नगर प्रमुख प्रजापति जुं पूर्वमन्त्री भा जू याता नगरपालिकाया थी थी पिथनात उपहार बियो दिल ।

शैक्षिक ऋणया ज्या इवः लोकं हवागु

मंसिर १२ गते

खवप नगरपालिकां न्ह्याकगु शैक्षिक योग्यताया दसिपौ धितो तयो ऋण बियगु ज्या इवः तस्कं लोकं हवाडः वांगु दः ।

धेबा मदयो चवय थ्यंक ब्वनय् मखाना धाय्मवायकः अजपुं ब्वनामिपिन्ता स्वयो खवप नगरपालिकां डादा हँ निसें मदिकक थुगु ज्या इवः न्ह्याकः वगु दः । नगरया सु नं ब्वनामिपुं धेबा मदयो चवयथ्यंक आखः ब्वनय् मखाना धाय् म्वाय्केगु नगरपालिकाया तातुना खः ।

थुगु ज्या इवः सं अः तक खय् ७५१ म्हासिता शैक्षिक ऋण बिय धुंगु खँ नगरपालिकां धायो चवंगु दः । खवप नगरपालिकाया प्रमुख सुनिल प्रजापति जुं डागूलाख तकातक ऋण बियागु खँ काडः, दयूगु दः । ज्या इवः न्ह्याकय् धुंसां निसें चवजाय्क उच्चशिक्षा ब्वपुं ब्वनामिपुं अपलं दयो वगु खँ नं वयकलं धायो दिल । नगरपालिकां धः काथं शैक्षिक ऋण स्वीकृति जूपुं मध्ये मुक्कं ४५४ म्हा ब्वनामिपिसं शैक्षिक ऋण कायो ब्वडः चवंगु दःसा ५१ म्हा सिनं ऋण पुलय् धुंकल । अःतक नगरपालिकां शैक्षण ऋण १३ करोड ६९ लाख ५० टु तका धेबा लाय् काथं छ्यलय् धुंकल । एक करोड व ख्वीप्यंगू लाख ९४

तका क्वतिया सावाँ ब्याज पू वय धुंकल ।

नगरप्रमुख प्रजापति जुं धायो दिल - खवप नगरपालिकाया प्यकगु नगर सभा २०७५ साल निसें शैक्षिक ऋण बियगु खायँ निर्देशिका दय्कः ऋण बियगु ज्या न्ह्याकगु खः । थव ज्या अः लोकं हवाडः वगु दः ।

ऋण कायता खवप नगरपालिका दुनयँ स्थायी बसोबास याडः चवंगु जेहेन्दार व विपन्तम्हा ब्वनामि जुयमःगु ऋण फवंम्हा ब्वनामिं ब्वनिगु विषय, सड्काय व शैक्षिक संस्था नेपाल सरकारया स्वीकृति दःगु वा नेपाल सरकारपाखं मान्यता दःगु जुयमःगु, शैक्षिक ऋण एसडई तगिं स्वयो चवययाय्पिन्ता जक बियगु धायो निर्देशिकाय् चवयो तःगु खः । ब्वंक चवंतलय् ऋण पुलय म्वःगु अलय ब्वनय धुंकः छसिकाथं ऋण पुलय मःगु व्यवस्था दः ।

अथेहे नगरपालिकापाखं चाय्कः तःगु नेगू इञ्जिनियरिड्ग कलेज नपां न्ह्यगू चवजाय्क शिक्षा बिड्गु शैक्षिक संस्थाय् नं दायँ प्यंगू करोड स्वयो अप या छात्रवृति ब्यू ब्यू वयो चवंगु दः ।

(गोरखापत्रपाखं आय हिला,सं)

ल्यासे ल्याम्हो पिन्के च्वजाय्कः ब्वडः थःगु देशया सेवा याय्गु भावना ब्वलांकय् मः

मंसिर १४ जते

खवप नगरपालिकाया आर्थिक वर्ष २०८१/८२ या लागिं १५१ म्हा नगरबासी ब्वनामिपिन्ता शैक्षिक ऋण बियगु खाँ थुइकेगु अभिमुखीकरण ज्या इवः मंगलवार खवप नगरपालिकाया सभा कक्ष सं जुल । खवप नगरपालिकाया प्रमुख सुनिल प्रजापति जुं नगरया सुं नं ब्वनामि धेबा मदयो च्वय थ्यंकः ब्वनय् मखाना धाय् म्वाय्कः खवप नगरपालिकां दांक ब्याजं शैक्षिक ऋण ब्यूगु नपां शिक्षाखय् छ्यःगु लायखं संसारे ह्यूपा ह्यता दक्ष जनशक्ति ब्वलांकय्ता घ्वासा जुइगु नपां स्वदेशय् विदेशय् न्ह्याथाय् हे ब्वडः वसां ल्यासे ल्याम्हो पिन्के देश सेवायाय् मःधाय्गु भावना ब्वलानय् मः धायो दिल ।

वयकलं च्वजाय्क ब्वनय्गु मतिं दायँ लाखौ ब्वनामिपुं विदेशय् वांसेलीं देया कलेजय् मचात मदयो कलेज तियमालिगु सड्कट वगु खाँ ब्याकसे ब्वनामिपिनिगु कन्हे गथे जुइ धाय्गु अमिगु मेहनतय् भर परय् जुई धायो दिल ।

प्रमुख प्रजापति जुं खवप नगरपालिकां खवपय् द्रहँ वैपुं विदेशी पर्यटकपिन्के कायो वगु पर्यटन शुल्कपाखं खवपया सम्पदा ल्यंकः म्वाकः तय्गु नपां विकास निर्माण याय्ता अपलं घ्वासा जूगु खाँ काडः दिसे थुकीं खवपया शैक्षिक सांस्कृतिक व सुचुकुचु ज्या खय् ह्यूपा ह्यता ग्वाहाली जूगु खाँ ब्याकः दिल ।

खवप नगरपालिकां खवप महोत्सवया ग्वस ग्वसे खवपया कला, संस्कृति भ्नीगु थःगु पहं थी थी ज्यात हलिमय खाँ व्याकय्गु तातुडागु नपां खवपया जनताय्ता अःपुक चिकित्सा शिक्षा ब्वनय् दय्केता खवप विश्वविद्यालय निः स्वानय्गु अवधारणा (ज्या इवः) ह्छ्याडागु खाँ काडः दिल ।

खवप नगरपालिकाया उप प्रमुख रजनी जोशी जुं शैक्षिक ऋण बाहेक नं खवप नगरपालिकापाखं चाय्क तःगु नेगु इन्जिनियरिड कलेज नपां न्ह्यगू च्वजाय्क शिक्षा बियगु ब्वनय्कथि सं दायँ प्यंगू करोडया स्वयो अपः छात्रवृति ब्यू ब्यू वयागु खाँ व्याकसे फुक्क विषयया उथिंग्यंकः महत्वदैगु खाँ नपां ब्वनामिपिसं थमनं ब्वडागु विषय दक्ष जुयगु काथं थःगु ब्वनय्गु ज्या ह्छ्याय्मः धायो दिल ।

खवप नगरपालिकाया प्रमुख प्रशासकीय अधिकृत वसन्त भट्टराई जुं खवप नगरपालिकाया शैक्षिक ऋण बियगु ज्या इवः नेपः देया लागिं ब्वस्यलागु ज्या खः धायोदिसे ऋण कःपुं ब्वनामिपिनिगु कन्हेया दिं सुथां लाय्मः धायोदिल ।

अथेहे शैक्षिक ऋण कःपुं ब्वनामिपुं विदेशय् वानय्गु मति मतय्ता इनाप यासे थुकीं अपलं ब्वनामिपिन्ता भिं जुई धायो दिल ।

वडा नं. ९ या वडाध्यक्ष रविन्द्र ज्याख्व जुं शैक्षिक ऋण छाय् वियमाला धाय्गु तातुना कडः दिसे वयकपुं नगरपालिका व नगरबासीप्रति उत्तरदायी जुयमः दक नं धायो दिल ।



खवप नगरपालिकां हिंन्यगू तगिं स्वयो च्वयया उच्च शिक्षा ब्वनय्ता शैक्षिक दसिपौ धितो तयो सहलियत ब्याज दरं कायो आखः ब्वनयँ मधुंतलय् पुलय् म्वाय्कः अलय् ब्वनय् क्वचाय् धुंकः प्यदालिपा निसें दायँ प्यब्वय छबव काथं ऋण पुलय् मः ।

थ्वनं हाँ ६०० म्हा सिनं डागू लाखतका तक ऋण कायो उच्च शिक्षा ब्वडः च्वंगुलि थुगु आ.व. २०८१/८२ सं १५१ म्हा सिता थुगु ऋण वियगु क्वः छ्यूसेलिं मुक्कं ७५१ म्हासिनं थुगु सुविधा कायो ब्वनिगु जुल । अः तक ऋण कःपुं मध्ये ४५४ म्हा सिनं ब्वडः च्वंगु दः सा ५१ म्हा सिनं ऋण पुलय धुंकल । शैक्षिक ऋणखय् १३ करोड ६९ लाख व डय्द्व ऋण लाय् छ्यःगु खःसा १ करोड ६४ लाख व ९४ तका क्वतिया सावाँ ब्याज ल्याहाँ वय धुंकल ।

व बाहेक खवप नगरपालिकां चाय्कः तःगु नेगु इन्जिनियरिड कलेज नपां न्ह्यगु उच्च शिक्षा बिइगु कलेजय् दायँ प्यंगू करोड स्वयो अपः छात्रवृति बियो वगु दः ।

खवप नगरपालिकां दांकः भिंकः बालाकः शिक्षा बियगु तातुडः चाय्क तःगु उगु शैक्षिक संस्थासं देशादेछिया न्हयद्व स्वयो अपः ब्वनामिपुं ब्वडः च्वंगु दः ।

नपालायगु ज्या इवः

मंसिर १४ गते

खवप नगरपालिकाया प्रमुख सुनिल प्रजापति जु नपां पूर्वाञ्चल विश्वविद्यालया रजिष्ट्रार नीलमणि पोखरेल जुं शुक्रबार नपालाडः दिसे खवप नगरपालिकापाखं चाय्क तःगु खवप इन्जिनियरिड कलेज व खवप कलेज अफ ल स्व वयगु भ्वलय खवपय् भःम्हा पोखरेल जुं प्रमुख प्रजापति जु नपालाडः दिसे खवप नगरपालिका शिक्षा लागाय् याडः वयो च्वंगु विस्कं काथंया कुतलः (अभ्यास) या खाँ थुइक दिल । शिक्षा लागाय् खवप नगरपालिकाया न्हयब्वया च्वछाय् बहजु धायोदिसे रजिस्ट्रार पोखरेल जुं व्वस्यलापुं दक्ष जनशक्ति ब्वलांकयगुलि थुगु कलेजं ग्यसुलागु ज्या याडः वयो च्वंगु खाँ धायोदिल ।



सहकारी दुजः पिनिगु जीवन च्वन्ह्याकय् मःगु :

मंसिर १५ गते

गुरु गणेश बचत व ऋण सहकारी संस्था लि. या हिं न्हयकगु साधारण सभा नेपाल मजदुर किसान पार्टीया केन्द्रीय दुजः नपां खवप नगरपालिकाया प्रमुख सुनिल प्रजापतिया मू पाहाँलय ब्रम्हायणी परिसरय् जुगू सभासं न्वचु तयो दीसे सहकारीं मंकः ज्या व सहकारीया दुजःपिनिगु जीवन च्वजाय्केगुलि जुयमःगु अलय पिनयँ जिल्ला व पिसं धेबामुडः बिसे वांगु खाँ काडः दिल ।

वयकलं सम्पदा ल्हवनय्-कानय व दानयगु ज्या विदेशीतयके ध्याछ धेबा हे मकः सिं दयक वयागु खाँ न्हिथांसे सूचुकुचु, सम्पदा ल्यंकः म्वाकः तयगु, शैक्षिक विकास विदेशीतय लागिं मखुसें भीगु हे लागिं खः धायोदिल ।

वयकलं खवप दे हज्याय फःगु शिक्षां याडः हे खः धायो दिसे थ्वहे मंसिर २८ गतेनिसें पुस २ गतेतक जुइगु खवप महोत्सव देश दुनय व देश पिनयया पर्यटकपुं दुकायो आयस्रोत अप्वयकेगु तातुनां याडागु खाँ नं ब्याकः दिल ।

वडाध्यक्ष रबिन्द्र ज्याख्व (९) जुं सहकारी संस्था स्थानीय जनतातयगु आर्थिक व सामाजिक स्तर च्वजायक यंकयगु व मुडः तःगु धेबां मालिबलय बियो ग्वाहाली यायगु खः धायोदिल ।

संस्थाया नायो कृष्णाराम कासिछ्वाया सभानायोलय जुगु ज्या भ्व सं भक्तपुर जिल्ला संघया हरिकृष्ण बल्ल, सिद्धिगणेश साकोसया रुद्रनारायण लाखा, सल्लाहकारपुं कृष्णभक्त लवजु व रामकृष्ण प्रजापति नं न्वचुतयो दयगु खः । अथेहे आर्थिक प्रतिवेदन दाँ भारी तुलसी केशरी प्रजापति, प्रगति प्रतिवेदन छ्याञ्जे सत्यराम ज्ञामरु, लेखा प्रतिवेदन हरिकृष्ण प्रजापति बबंगु खः सा न्वकु श्री प्रसाद प्रजापति, सीता लक्ष्मी कोजु व गौतम कुतुव जु पिसं नं न्वचु तयो दयगु खः ।

ज्या भ्वः सं असल बचत कर्ता, असल ऋणी, विशिष्ट व्यक्ति तः मुंज्यासं पिब्वयागु संस्थाया प्याखनय ग्वाहाली याम्हा नृत्य निर्देशक, व्यवस्थापक व ब्वतिकः पुं प्याखं म्वः पिन्ता मतनाया चिं व दसिपौ मुपाहाँ पाखं लःल्हाड दयगु खः ।



वयकलं खवप नगर दूनय बहुउद्देशीय सहकारी संस्थात चाय्केता दर्ता मयाडागु व अजगु संस्थाय् धेबा मुनय् मतय् जक सूचं वियागु खवप नगर दुनय् मःगु स्वयो अपः सहकारी संस्था दःगु खाँ काडः दिल ।

बांलाक बडः शैक्षिक योग्यता दक्षः पिन्ता ज्या मदै दक धन्दा काय म्वालिगु खाँ व्याकसे वयकलं खवप देता 'शैक्षिक हव' काथं च्वन्ह्याकः वयो च्वडागु खाँ ब्याकः दिल । नपां

खप महोत्सव प्रचारार्थ सूचुकुचु ज्या भवः

मंसिर १५ गते

खप महोत्सव प्रचारार्थ खपया थी थी वडाय सूचुकुचु ज्या इवः न्ह्याकगु जुल । थ्वहे इवल्य खप नगरपालिका वडा नं २ या गवसालय सूचुकुचु ज्या इवः न्ह्याकगु जुल ।



थानाया कला, संस्कृति, सम्पदात ल्यंकः म्वाकः तय्मः धोयोदिल । अथेहे वडा नं. ९ या गवसालय नं नियमित सूचुकुचु ज्या इवः जुल । खप महोत्सवया प्रचारार्थ ८ नं. वडाय नं सूचुकुचु ज्या इवः न्ह्याकल ।



अथेहे खप नगरपालिका वडा नं ७ सं ७ वडा कार्यालयया गवसालय हनुमान घाट परोपकार (खोहे) सूचुकुचु ज्या न्ह्याक : (खँचा, वाँचुन्वः, इनाचो, चोर्चा, पलिखेल जुयो याताय थ्यंकः क्वचायकगु खः । उगु सूचुकुचु ज्या भवःखय् ब्वनयकुथि, सहकारी संस्थाया, टीम, पुचः, क्लब, किसान, मजदुर युवा, महिला, ब्वनामि, कर्मचारीपुं भःगु खः । उगु ज्या इवः क्वचायकः जूगु सभासं वडा नं.७ या वडाध्यक्ष उकेश कवां जू खप महोत्सवया तयारीया खाँ व्याकसे थः थः गु थासं गवाहली याय्ता इनाप याडः दिल ।

अथेहे वडा नं. १० या गवसालय जूगु सूचुकुचु ज्या भवः सं त्वालयायपुं थी थी संघ-संस्था, ब्वनयकुथि, सहकारी संस्थायायपुं जाडः महालक्ष्मी, थालाछँ, नागपोखरी, बेखाल, दीपङ्कर महाविहार, क्वाठण्डौं, लाम्हुग जुयो कमलविनायकय् क्वचायक जूगु सभासं वडाध्यक्ष लक्ष्मीप्रसाद ह्योमिखां कला, संस्कृति व संस्कार स्वयगु- सयकेगु छगू मौका काथं २०८१ मंसिर २८ गते निसे पुस २ गतेतक जुडगु खप महोत्सव तः जिक हानय्ता इनाप याडः दिसे सकलसिता खाँ व्याकय्ता थुगु ज्या भवः तयागु खाँ नं काडः दिल ।

थानाया प्याखं, बाजागाजा, कला-संस्कृति, सीप हस्तकला, घरेलु उद्योगत पिब्वइगु खाँ नपां वयकलं खप नगरपालिकां जनताता लाहातय ज्यादैगु अपलं तालिमत ब्युब्युं वगु खाँ व्याक दिल ।

वयकलं १० वडा बासुरीया धिं धिं बल्ला, नौका (डुङ्गा) विहार, नसाः ब्वज्या पुलांगु का छियगु विधि, चिकं काकयगु, नेवः पहः या जीवनशैलीत पिब्वइगु खाँ नं ब्याकः दिल ।

वडाया दुजःपुं हिरा ख्याजुं खप नगर सूचुपिचु व यचुक तयता भी न्हयलुवा पिसं सूचुकुचु अभियान न्ह्याक वगु खाँ कुल : दिलसा हरिरत्न गोर्खाली जू खप देता पर्यटकीय गन्तव्यकाथं ह्य्याय्ता

ज्या भवः सं वडाया सचिव राम गोबिन्द श्रेष्ठ व वडा निरीक्षक रामकृष्ण प्रजापति जू पिसं नं सूचुकुचु व महोत्सवया खाँ काडः दिल ।

नुवाकोटया ब्वनामिपुं

मंसिर १५ गते

नुवाकोटया ब्वनामिपुं खप नगरपालिका थी थी ज्या इवःत सयके थुडकेगु मतिं खप नगर प्रमुख सुनिल प्रजापति जु याता नपालः वगु जुल ।



दक्षिण कोरियाया महामहिम राजदूत पार्क ताइयोड ख्वपय

मंसिर १७ गते

ख्वप नगरपालिकाया प्रमुख सुनिल प्रजापति जू नपां नेपःया लागिं दक्षिण कोरियाया महामहिम राजदूत पार्क ताइयोडः जु ख्वपय भ्नायो सोमबार नपालाडः दिसे सम्पदा ल्हवनय कानय, स्वास्थ्य, पर्यटन च्वजायकेगु थजगु खायँ मंकः ज्या व ग्वाहाली कालबिलया खायँ छलफल याडः दिल ।

नपालायगु इवल्य नगर प्रमुख प्रजापति जुं नेपः या विकासया निंतिं दक्षिण कोरियाया ग्वाहालीता सुभाय देछायो दिसे वैगु दिनय नेगु देशया स्वापु अजनं क्वात्तुयो वानिगु विचः प्वंकः दिल ।

ख्वप नगरपालिकां विदेशी पर्यटक पिन्के कायो वयो च्वंगु धेबां (शुल्कं) ख्वपया सम्पदा ल्यंकः, म्वाकः भिंकः तयगु नपां पर्यटन व्यवसाय ह्छ्यायगुलि खर्च याडः वयागु खाँ ब्याकसे प्रमुख प्रजापति जुं २०७२ सालय ब्वःगु. तः भ्वखाचां थुडः स्यंकः ब्यगु ख्वपया सम्पदात ल्हवनयता कोरियाली सरकारं यागु ग्वाहाली लुमांके बहजू धायो दिल ।

ख्वपया सम्पदा ल्यंकः म्वाकः भिंकः तयगु ज्या, ख्वपय लाहातय ज्या दैगु सीप मूलक तालिम केन्द्र चायकेगु नपां ख्वपया किसानतयगु बुई वा सयकेता प्राविधिक ग्वाहाली यायगु विषय खाँ ब्याक हज्यायगु खाँ नं वयकलं काडः दिल ।

वहेइवल्य महामहिम राजदूत ताइयोड जुं ख्वप नगरपालिकां ख्वपया जनताया मति काथं ज्या याडः च्वंगु खाँ न्यडः वयागु नपां सम्पदा ल्यंकः म्वाकः तयगुलि ख्वप नगरपालिका च्वजःगु व ब्वसेलागु खाँ काडः दिल ।

राजदूत तोडयोड जु तःक हे ख्वपय वय धुंगु खाँ कुल



दिसे मोहनी व स्वन्तिया दश्वी ख्वपय चाहू वयागु इलय ख्वपया ल्यासे ल्याम्होपिसं सांस्कृतिक ज्या इवःसं दुतिडः वयो च्वंगु खाडः थःता बांलागु लिच्वः लागु खाँ नं ब्याकसे कुटनीतिक लागु सं ख्वपया सम्पदा ल्यंकः म्वाकः तयगु शिक्षा, स्वास्थ्यया लागाय जुयो च्वंगु थःगु हे मौलिक पहः या बांलागु लिच्वः वयो च्वंगु खाँ ब्याकसे ख्वपया किसानतयता अपलं वा सयके बियता कोइका पाखं प्राविधिक ग्वाहाली यायगु मति दःगु खाँ काडः दिल ।

उगु इवल्य वडाध्यक्षपुं रबिन्द्र ज्याख्व (९) हरिप्रसाद बासुकला (२) पर्यटन शाखा प्रमुख गौतम प्रसाद लासिव व प्रशासकीय अधिकृत दामोदर सुवालपुं नं भ्रःगु खःसा प्रमुख प्रजापति जुं महामहिम राजदूत ताइयोड जू याता लोकं ह्वागु म्हवयखा इयो व ख्वप नगरपालिकाया पिथनात उपहार काथं लः ल्हाडः दिल ।

लैङ्गिक हिंसा विरुद्ध ज्या इवः

मंसिर १८ गते



ख्वप नगरपालिका ७ नं वडा कार्यालयया ग्वसालय जुगु लैङ्गिक हिंसा विरुद्धया सचेतनाया ज्या इवः नपां ख्वप महोत्सवया प्रचारार्थ जुगु मेलासं ख्वप नगरपालिकाया उप प्रमुख रजनी जोशी जुं २१ गू शर्दिया इलय नं लैङ्गिक हिंसा जुइगु धायगु खाँ ग्वाकः कानय मफूगु नपां थी थी सामाजिक ज्या इवः न्ह्याकः ल्हवडः यंकय मः धायो दिल ।

वयकलं अः मिसात नपां मिजंतयता नं हिंसा याड वगु अलय उकिया ल्या मरुगु खाँ ब्याकसे सम्पतिया लोभं गुलिं मिसातयसं इहिपा याइगु अलय छुं दिन हे त्वः तिगु थजगु विकृति

डाडः वगुलिं उकिता म्हवचा यायां यंकय्ता सकलें हज्याय् मः धायो दिल ।

वयकलं न्हँगु पुस्ताया वनामिपिन्ता पाठ कण्ठयाकय्गु स्वयो नैतिक शिक्षा व्बंकय् मःगु अलय ज्यामालय्गु नामय् ल्यासे ल्याम्होपुं विदेशी वानिगु म्हवचा याय्ता शिक्षा प्रणाली हे हिलय् मःगु नपां ख्वप नगरपालिकाया ग्वसालय जुइगु ख्वप महोत्सवय् ख्वपया कला, संस्कृति, चाडपर्व व स्थानीय जीवन शैलीया पहः बांलाक स्वयदैगुलिं थःथः गु थासं फः थें ग्वाहाली याय्ता इनाप याडः दिल ।

वडाध्यक्ष उकेश कवां (७) जुं महोत्सवय् भीसं सुचुकुचु

नायो भाजु विजुकुँ जु दाडः च्वंगु थी थी सम्पदात स्वः भाल

मंसिर १८ गते



नेपाल मजदुर किसान पार्टीया नायो भाजु नारायणमान बिजुकुँ (रोहित)जुं लायकुली च्वंगु थन्थु दरबार, गःहिति च्वंगु दाडः च्वंगु लक्ष्मी नरसिंह देगः व तालाकवय् च्वंगु इखालाछी मथ दाडः च्वंथाय् भायो स्वयो दिल ।

स्वःभाय्गु इवल्य नायो भाजु बिजुकुँ जुं सम्पदा ल्हवनय-कानय व दानय्गु ज्या खय् ख्वप नगरपालिकाया न्हयलुवा च्वछाय् बहज्गु खँ ब्याकसे सम्पदा ल्यंकः म्वाकः भिंकः तय



सच्छिव स्तीच्यागुगु स्वप पौ, बःछि पौ(पाक्षिक)

बांलाकय् मःगु जनताया ग्वाहालीं तः भवखाचां थुगु सम्पदात फुकक ल्हवनय् फःगु खँ ब्याकसे ख्वपया कला संस्कृति परम्परा व जीवन शैली हे भीगु म्हासिइका खः धायो दिल ।

ख्वप महोत्सवया कजि गौतम प्रसाद लासिव जुं महोत्सव तःलाक हानय्ता न्हपा-न्हपा याय्थें सकल नगरबासी पिसं, ग्वाहाली याडः दियता नपां थमनं सयागु, फयागु क्षमता पिठवइगुलि नगरपालिकां विश्वास कायो च्वंगु खँ काडः दिल ।

वडाध्यक्ष उकेश कवांया सभानायोलय् जूगु उगु ज्या इवः सं वडाया दुजपुं रञ्जना त्वाती व हिरा ख्याजुं नं न्वचु तयो द्यगु खः ।

फःसा न्हँगु पुस्ताया सेवा जुइगु खँ काडः दिल । नपां वयकलं ख्वपया थःगु पहः ल्यंकः भिंकः तय्गु ज्या व्बस्यलागु नपां थजगु ज्याखय् जनताया साथ व ग्वाहाली तस्कं महत्वपूर्ण जूगु खँ काडः दिल ।

वयकलं सम्पदा ल्यंकः म्वाकः तय्गु ज्याया जिम्मेवारी स्थानीय तहता ब्यसा बांलाक ज्या याइगु खँ नपां सम्पदाया खँ न्हँगु पुस्ताया कानय् फःसा ल्यंकः, म्वाक व भिंकः तयो तैगु अलय् थानाया भीगु मौलिक पहः हे ख्वपया म्हासिइका खः धायोदिल ।



ख्वपया लक्ष्मी नरसिंह देगः न्हयसदा पुलांगु खानय दःगु थुगु दुनयँ शक्तिनपांया शान्त भावया लक्ष्मीता घयपुडः तःगु नरसिंह द्योया मूर्ति नं दः । ख्वप महोत्सवया तयारीया इवल्य ख्वप नगरपालिकां थानाया सांस्कृतिक व ऐतिहासिक सम्पदात ल्यंकः म्वाकः भिंक तय्गु ज्या चतारं याडः च्वंगु दः ।

स्वःभाय्गु इवल्य ख्वप नगरपालिकाया प्रमुख सुनिल प्रजापति, उपप्रमुख रजनी जोशी, प्रमुख प्रशासकीय अधिकृत वसन्त भट्टराई, वडाध्यक्ष व जनप्रतिनिधिपुं नं नपां भःगु खः ।

ब्वनामिपुं फुकक लागाय् अब्बल जुयमः

मंसिर १२ जते



खप नगरपालिकापाखं चाय्कः तःगु खप कलेजय् शैक्षिक वर्ष २०७६/७७ या स्नातक तगिं पाखय् बी बी एस, बीए, बीएस्सीडब्लू, बीएससी व बीवी एम् ज्या इवः सं भर्ना जूवपुं ब्वनामिपिनिगु विदाइया ज्या इवः बुद्धवार यासे मू पाहाँ नेपाल मजदुर किसान पार्टीया नायो नपां वरिष्ठ राजनीतिज्ञ नारायणमान बिजुक्छेँ (रोहित) जुं खादा क्वखाय्क मतिनाया चिं लः ल्हाडः दिसे नीछगू शदिया ब्वनामिपुं शैक्षिक, सामाजिक, राजनीतिक व सैद्धान्तिक फुकक पाखं (अब्वल) धिसिलापुं जुयमः धायोदिल । वयकलं ब्वनामिपिसं ब्वनयकुथिपाखं सय्केगु धाय्गु हे भिंगु बानी (आचरण), बोली वचन, व्यवहार व संस्कार खः धायो दिसे भिंपुं, बांलापुं शिक्षक पिनिपाखं सय्कः अमिसं यागु बांलागु व्यवहारया लिचवलं भिंपुं नागरिकपुं ब्वलानिगु खाँ काडः दिल ।

ब्वनामिपुं तः मलातकिं शिक्षकपिनिगु योग्यता मगाताला धायो न्हयसः थानिगुलिं कलेजय् ब्वेँ वपुं थी थी जिल्लाया ब्वनामिपिन्ता ई काथंया शिक्षा बियता ब्वनयकुथिपाखं बः याय् मः धायो दिल ।

नायो भाजु बिजुक्छेँ जुं योग्य व सक्षमपुं शिक्षकपिसं ब्वनामिपिन्ता बांलागु लिचवः लाकय् फँगु खाँ काडः दिसे कर्मचारी पिसं थःगु जक भिं मस्वसेँ भिंम्हा नागरिक काथं पिब्वयगु कुतः याडः जनताया सेवा याय् मः धायो दिल ।

ब्वनामिपिन्ता विदेशय् मवासें मगागु ई हैपुं सरकार व कलेजया प्राध्यापकपुं जिमेवार जुइगु खाँ व्याकसे वयकलं शिक्षक पिसं ब्वनयगु ब्वंकय्गु नपां नपां देशभक्त नागरिक ब्वलांकय्गु नं याय् मः धायो दिल ।

न्हँगु पुस्तां देया सार्वभौमिकता ल्यंकय्ता मल्वासा वैगु

पुस्ता राजनीतिक रूप बमलाइगु खाँ ब्याकसे वयकलं थमनं सयागु ज्ञान व सीपता निः स्वार्थ जुयो देया लागिं छ्यलय्ता घ्वाडः दिल ।

ज्या इवःया सभाया नायो, कलेज व्यवस्थापन समितिया नायो नपां खप नगरप्रमुख सुनिल प्रजापति जुं ब्वनामिपिन्ता थमनं ब्वडागु विषयसं विशेषज्ञ जुयो देश व जनताया सेवा याय् फय्म भिन्तुना देछायो दिल ।

खपय् छ्वा छँ, छम्हा स्नातक दयकेगु ज्या पूवानय धुंकगु खाँ ब्याकसे वयकलं खप देता शैक्षिक रूपं हछ्याय्ता नगरपालिकापाखं चाय्कः तःगु कलेजत पाखं ग्वाहाली जुयो च्वंगु दः धायोदिल ।

ल्यासे ल्याम्होपुं ब्वनामिपिनिगु जीवनया आजु देश व समाजया सेवापाखय् स्वयमः गुलि बः यासे वयकलं विदेशय् वापुं नेपःमि पिन्के थःगु देशया सेवायाय्गु भावना ल्यडः च्वनय् मः धायोदिसे नेपःया शिक्षा निजीकरण व ब्यापारीकरण पाखय् वाडः च्वंगुलिं गरिब जनतात शिक्षा काय् मफयो वांगु नपां व्यक्तित्व विकासय् सकल ल्यासे ल्याम्हो पिन्ता उथियंक अवसर दैगु अवस्था वयकेता खप नगपालिकां कुतः याडः च्वंगु खाँ काडः दिल ।

उप प्रमुख रजनी जोशीं सभ्य व सुसंस्कृत समाज निःस्वानय्ता खप नगरपालिकां ह्दाय् च्वडः ज्या सां सां वगु खाँ ब्याकसे खपया शैक्षिक क्रान्तिखय नगरपालिकापाखं चाय्क तःगु कलेजयाय्गु नं बांलागु लाहा दः धायोदिल ।

खप कलेजया प्राचार्य प्रकाश कुमार श्रेष्ठं खप कलेजं ब्वलापुं ब्वनामिपुं कलेजया धेबां काय्मरुपुं सम्पति खः धायोदिसे ब्वनामिपुं थःगु जक भिं मस्वसेँ देश व समाजया नितिं नं ज्या

सच्छिखत स्तीच्यागूगु खवप पौ, बःछि पौ(पाक्षिक)

सानय्गु भावना ज्वडः हज्याय्ता बः याडः दिल ।

खवप महोत्सव ज्वः छि खवप कलेजय् थी थी शैक्षिक
व्वज्या जुड्गु खाँ ब्याकसे वयकलं व्वनामिपिन्ता महोत्सवया
इलय् बांलाकः व्वति काय्ता इनाप याडः दिल ।

खवप मा.वि. या प्राचार्य लक्ष्मी प्रसाद कर्माचार्य जुं
व्वनामिपिसं सामाजिक दायित्व कुबियता हज्याय् मःगु खाँ ब्याकसे
ल्वाय् फःपुं जनशक्ति विदेशय् वांसेलिं नेपालय् ज्यायाय् फःपुं
शक्ति म्हँव जुयो वांगु खाँ ब्याकः दिल ।

ज्या इवः सं वडा नं. ९ या वडाध्यक्ष रविन्द्र ज्याख्वं,
खवप कलेजया उप-प्राचार्य राजेश कुमार श्रेष्ठं नं न्वचु तयो

द्यूगु खः ।

ज्या इवः सं बी.इ. संकायया व्वनामि आस्था कार्की,
बी.एस. डब्लुया सुनेना मानन्धर वी वी एमया रोशनी शिल्पकार,
शर्मिला श्रेष्ठ व वी एस.सी. वातावरण विज्ञानया पुजा मगरं
कलेज व्वडा बलय्या थःगु अनुभवत काडः दिल ।

ज्या इवः सं एम. वी. एस. या इन्चार्ज रूपक जोशी,
एम.ए. अर्थशास्त्रया कजि रूपक खड्का, एम. ए. अंग्रेजीया कजि
कमिनिका न्याइच्याई, एम.एस.सी. वातावरण विज्ञानया कजि
मिरा प्रजापतिजुं विषयगत विशेषताया खाँय व्वनामिपिन्ता
अभिमुखीकरण याडः द्यूगु खः ।

३३ कगु अन्तर्राष्ट्रिय अपाड्गता दिवस

मंसिर १२ गते

३३ कगु अन्तर्राष्ट्रिय दिवसया लसताय् खवप
नगरपालिकाया ग्वसालय 'समावेशी तथा दिगो भबिष्यको आधार,
अपाड्गता भएका व्यक्तिहरुको प्रबल नेतृत्व यसको आधार'
धाय्गु नारा ज्वडः जुगु ज्या इवःसं खवप नगरपालिकाया प्रमुख
सुनिल प्रजापति जुं नगर दुनय्या अपाड्गता जूपिन्ता थर्मस इडः
व्यूसे मचातय्या जुड्गु अपाड्गता गुलिफता उलि मथां सिड्के
फःसा उपचारयाय्ता अःपुड्गु खाँ कांसे अपाड्गता जूपिन्ता खवप
नगरपालिकां थी थी ज्या इवःत याड वयो च्वंगु दः धायोदिल ।



अपाड्गतापिसं दुःख सिड्गु जक मखुसे परिवार व
समाजं नं हेबाय्-चबाय् याड्गु खाँ ब्याकसे वयकलं अपाड्गता
जूपिन्ता सम्मानयोग्य जीवन हानय्गु अधिकार पक्का याय्ता
खवप नगरपालिकां ज्या याडः वयो च्वंगु दः धायो दिल ।

अपाड्गताया खाँय व्यवस्थित कानून दय्कः उकिता
छ्यलय् फःसा अपाड्गता जूपिन्ता म्वाय अःपुड्गु खाँ नपां ज्या
बियगु, थी थी ज्या दैगु सीपया तालिमत ब्यू ब्यू अमिता बांलाक,

सबल यायां यंकय् फै धायो दिल ।

भक्तपुर नगरपालिका अपाड्गता समितिया नकीं नपां
उपप्रमुख रजनी जोशी सन १९९२ निसे हलिमय डांकः अपाड्गता
दिवस डाय्कः वगु खाँ ब्याकसे अपाड्गता जूपिनिगु हक, अधिकार
ल्यंकः तयता, जनमानसय् चेतना व्वलांकयता नपां अमिगु
म्हासिड्का, आत्म सम्मान व स्वाभिमानता च्वजाय्केता हलिमय
व्याक अपाड्गता दिवस डाय्क वगु खाँ काडः दिल ।

खवप नगरपालिकां अपाड्गता जुपुं मनूता मुंकः, स्वास्थ्य
शिविर व अतिरिक्त कृयाकलापत न्ह्याक सिरपा नं बियो
वगु खाँ ब्याकसे वयकलं अपाड्गता जूपिन्ता व अमि
अभिभावक पिन्ता निःशुल्क स्वास्थ्य शिविर न्ह्याक वयो
च्वडागु खाँ काडः दिल ।

खवप नगरपालिकाया प्रमुख प्रशासकीय अधिकृत वसन्त
भट्टराई जुं अपाड्गता जूपिनिगु व्यक्तित्व विकासया नितिं
उथिं ग्यंक मौका बियमःगुलि बः यासे अपाड्गता सम्बन्धी
ऐन कानून दय्कः उकिता भिंकः छ्यलय्या बः याय्मः
धायो दिल ।

अपाड्गता सम्बन्धी अस्थायी समन्वय समितिया दुजः
हिमालय श्वर लाल मूलं अपाड्गता जुड्गुया खाँ ब्याकसे
अजपिन्ता मन क्वातुकय्या परिवार व समाजं याय्मः
धायोदिल ।

अपाड्गता समितिया दुजः श्यामकृष्ण खत्री व
कार्यपालिकाया दुज रोशन मैयाँ सुवालं नं न्वचु तयो दिगु खः ।
अपाड्गता दिवसया लसताय खवप अस्पतालया प्राविधिक ग्वाहालीं
अपाड्गता जूपुं व अमि परिवारपिन्ता स्वास्थ्य शिविर तःगु
खः । वहे लसताय खवप नगरपालिकां खवप अस्पतालय्
फिजियोथेरापी मेसिन नं लः ल्हाडः द्यूगु खः ।

राष्ट्रीय महिला सामुदायिक स्वास्थ्य दिवसया लसताय स्वम्हा स्वास्थ्य स्वयंसेविका हान

मंसिर २० गते

खप नगरपालिकां 'राष्ट्रीय महिला सामुदायिक स्वास्थ्य दिवस २०८१' या लसताय थौं खप नगरपालिकां स्वम्हा चवजःपुं स्वयं सेविकापिन्ता हानय् ज्या यागु जुल । खप नगरपालिकाया उपप्रमुख रजनी जोशी जुं चवजःपुं स्वास्थ्य सेविकापुं वडा नं १० या रामलक्ष्मी दुवाल, वडा नं. १ या शिव लक्ष्मी दुवाल व वडा नं ६ या कृष्ण लक्ष्मी कासुलाता धेबा नपां दसिपौ लः ल्हागु जुल ।



उप प्रमुख जोशी जुं खप नगरपालिकाया स्वास्थ्य व सामाजिक ज्याइवःसं ज्यासाडः दीपुं स्वास्थ्य स्वयंसेविकापुं तस्कं हानय्बहपुं खः धायोदिसे खप नगरपालिकां न्ह्याकः वगु खप अस्पताल व छँ छँ नर्सिडया ज्या इवःखय् वय्कपिनिगु तः हांगु लाहा दःगु खौं काडः दिल ।

प्रमुख प्रशासकीय अधिकृत वसन्त भट्टराई जुं स्वास्थ्य

स्वयंसेविकापुं सरकारया प्रतिनिधित्व याडः जनताया छँ छँ भाइपुं जूगुलिं न्ह्यागु नं ज्याखय् तः लाक हानय्ता स्वास्थ्य स्वयं सेविकापुं हदाय लाइगु खौं काडः दिल ।

वडाध्यक्ष रविन्द्र ज्याखव(९) जुं थः थः गु वडाया आधारभूत प्राथमिक स्वास्थ्य सेवा दुनय्या सुरक्षित मातृत्व परिवार नियोजन, बाल स्वास्थ्य व समुदायया लिधंसाय् जुइगु स्वास्थ्यया ज्या इवः तः लाकयता स्वास्थ्य स्वयं सेविका पिनिगु लाहा दैगु खप महोत्सव व स्वास्थ्य प्रोफाइल दयके तांगुलिं उकिनं वयकपिसं ग्वाहाली याय्ता बः याडः दिल ।

ज्या इवःसं खप अस्पतालया निमित्त मेडिकल डाइरेक्टर मजेश प्रताप मल्ल, स्वास्थ्य स्वयं सेविकाया पाखं प्रतिनिधि बबि मैयाँ लघु व स्वास्थ्य संयोजक रत्न सुन्दर लासिवं नं न्वचु तयो द्यूगु खः सा ज्या इवःया खौं नं काडः दिल ।

महोत्सव तयारी समिति वडा नं ४ बोलाछँया कजि हरिसुन्दर सुवालं महोत्सव हलिमयया अपलं पर्यटकपिसं स्वः भाइगुलिं व्यवस्थित याय्मः धायोदिल ।

गवसाखलया पञ्चरत्न सैजुं न्हा याय्गुलिं ज्ञान कायो अजः बांलाक पिब्वयगु ई थुगु महोत्सव जूगुलिं सकलसिनं सामूहिक भावना ज्वडः हज्याय्मः धायोदिल । नपां गवसाखलःया राजेन्द्र माकं पुर्खा दयकः तकगु सम्पति भीगु कला व संस्कृति' या नारा च्वजाय्केता हस्तकलाया सीपता शिक्षा नपां स्वाडः ब्यवसायिक काथं न्हँगु पुस्ताता लः ल्हाडः यंकय् फःसा आर्थिक रुपं नं हज्याय् फँ धायो दिल । थुगु ज्या इवः पुरुषोत्तम जाकीबञ्जार या सभा नायोलय् जूगु खः ।

विश्वकर्मा साकोसया साधारणसभा

मंसिर २३ गते

विश्वकर्मा वचत व ऋण सहकारी संस्थाया हिन्ध्यकगु साधारण सभाया उलेज्या खप नगरपालिकां वडा नं ९ या वडाध्यक्ष रविन्द्र ज्याखवं याडः दिसे आर्थिक, नैतिक व भौतिक ज्या इवः त समुदाय दुनय चवडः ज्या सानय् मःगु नपां मंसिर २८ निसे पुस २ गते तक जुइगु खप महोत्सवसं खपया कला, संस्कृति, भीगु थःगु पहः या बाजा गाजा, प्याखंत क्यनिगुलिं भी फुक्क छप्पा जुयो ग्वाहाली याय्मः धायोदिल ।

भक्तपुर जिल्ला बचतया छ्याञ्जे जगन्नाथ प्रजापति जुं

मभिगु ज्या नपां सहकारी सचेत जुयमः गु उदय बचत या कृष्ण राम प्रजापतिं भिन्तुना देछायो द्यूगु खःसा संस्थाया संस्थापक अध्यक्ष अमर प्रजापति व सल्लाहकार लक्ष्मी प्रसाद प्रजापतिपिसं नं न्वचु तयो द्यूगु ज्या इवः सं संस्थाया नायो नपां सभाया नायो शमशेर बहादुर ज्याखव जुं सकल दुजः पिनिगु राय सल्लाह काथं हज्याय्गु बचं बिसे सभा क्वचगु खः ।

उगु ज्या इवः सं सञ्चालक दुजः पूण्यश्वरी ज्याखव नं न्वचु तयो द्यूगु खः ।

सरकारी अस्पतालया डाक्टरपिसं निजी अस्पताल चाय्के बियमज्यु

मंसिर २४ गते



स्वास्थ्य व जनसंख्या मन्त्रालयया ग्वसालय स्वास्थ्य मन्त्री प्रदिप पौडेल भःगु स्वनिगया महानगर व नगरपालिकाया प्रमुखपुं नपां स्वास्थ्य सुधार गथे याःसा जिई धाय्गु ज्या इवः सोमवार क्वचाल ।

ज्या इवःसं मन्त्री पौडेलं संघीय अस्पतालय विरामीपुं अपलं वयो च्वंगु खाँ कुलः दिसे सरकारी अस्पतालया सेवा सुविधाय लिधंसाय गजगु अस्पताल जक ब्वथलय् मः धायोदिसे स्वास्थ्य बीमाख्यु (आवद्ध) दुतिड् च्वंगु अस्पतालं याइगु रिफर सिस्टमता गथे व्यवस्थित याय फै धाय्गु खाँ संघ, प्रदेश व स्थानीयतहया दश्वी मंकः कुतः जुयमःगु खाँ नपां स्वनिगलय् छगू वडाया छगू छगू स्वास्थ्य केन्द्र मतसे मगागु काथंया नीति हछ्याडागु खाँ काडः दिल ।

छलफलसं न्यंगु न्ह्यसः या लिसः बियो दिसे वयकलं आधारभूत अस्पताल स्यल्लाकय्गु मतिं मन्त्रालयं कायो च्वंगु नपां वायु प्रदुषण नियन्त्रणय प्रदेश सरकार व स्थानीय तहया दश्वी मंकः कुतः जुयमः धायोदिल । महिला स्वास्थ्य स्वयमसेविका पिसं निःस्वार्थ जुयो सेवा बियमःगु खाँ काड दिसे वयकलं स्वास्थ्य स्वयमसेविकापिनिगु क्षमता अज च्वजाय्केता थःपुं सकारात्मक जुयागु खाँ काडः दिल ।

ख्वप नगरपालिकाया प्रमुख सुनिल प्रजापति जुं स्वास्थ्य बीमाया धेबा इलय हे मब्यूसेलिं सरकारी अस्पतालं समस्या फयो च्वंगु खाँ नपां सरकारं डेड्गु ल्वयया खाँ इलय हे मः काथं ब्यवस्था याय् मफूगुलिं तः च्वतं जूगुलि कुंखिडः दिल ।

ख्वप नगरपालिका पाखं चाय्क तःगु ख्वप अस्पतालं ५०९ म्हा सिता प्रसूति सेवा (मचा बुइके ब्यूगु) बिय घुडा नं न बिमां ध्यबा पुल बिला । न आमा सुरक्षा कार्यक्रमं छुं गवाहाली याता फुक्क खर्च नगरपालिकां हे याडः च्वडागु खाँ काडः दिल । वयकलं उच्च रक्तचाप, चिनील्वय, क्यान्सर, तुगः ल्वय, मस्तिष्कघात

थजगु मपूनिगु ल्वयत अपः खानय् दयो वगुलिं (जनचेतना मूलक) जनता ग्वाकय्गु ज्या अपलं याय्मःगु खाँ न्हिथाडः दिल ।

स्वनिगः या सरकारी अस्पतालय् डाइलासिस सेवाया लागिं मेसिनया ब्वस्था याय् फःसा ल्वगितय्ता अः पुइगु खाँ ब्याकसे प्रमुख प्रजापति जुं मेसिन बिल धःसा ख्वप अस्पताल डाइलासिस सेवा न्ह्याकय्ता तयार दःगु खाँ नं काडः दिल ।

स्वास्थ्य मन्त्री जुं इलय् -ब्यलय् अस्पतालय भ्नायो स्वयो दियमःगु खाँ ब्याकसे वयकलं फुक्क सरकारी अस्पतालय मः काथंया जनशक्ति व स्वास्थ्य उपकरणत बियम मन्त्रालयं बः याय् मःगु सुभाब बियो दिसे वयकलं सरकारी अस्पतालया डाइरेक्टर जुया नं निजी अस्पताल चाय्किपिन्ता पदं लिकायो छ्वय्मः धायो दिल ।

सरकारी अस्पतालय हाजिर याडः निजी अस्पतालय, ज्या याइपुं चिकित्सकपिन्ता कार्बाही याय्ता मन्त्री पौडेलया ध्यानाकर्षण यासे वयकलं भागवण्डाय् डाक्टर नियुक्ति याइगु ज्या हट्टय याय्मः धायोदिल ।

अथेहे गोकर्णेश्वर नगरपालिकाया प्रमुख दिपक कुमार रिसाल जुं थःगु नगर दुनय् बःछिया छकः मपुनिगु ल्वयत मचाछँ व दुरुव्या क्यान्सरया शिविट तयो जाँचय याडः वयागु खाँ काडः दिल । चन्द्रागिरी नगरपालिका प्रमुख धनश्याम गिरीं स्वनिगलं पिनय्या आधारभूत तहता बिस्कं पहलं स्वयमःगु खाँ ब्याकसे थःगु नगरपालिकां विद्यालय नर्ससेवा नपां महिला स्वास्थ्य स्वयंसेविकापुं नं छ्यलः च्वडागु खाँ काडः दिल ।

गोदावरी नगरपालिका प्रमुख गजेन्द्र महर्जनं संघ, प्रदेश व नगर अस्पतालाया सेवा सुविधा बियगु खाँ ब्वथलय मः धायोदिसे प्राथमिक स्वास्थ्य उपचार केन्द्रता धिसिलाक न्ह्याकय् मः धायोदिल ।

मध्यपुर थिमि नगर प्रमुख सुरेन्द्र श्रेष्ठ, शङ्खरापुर नगर प्रमुख रमेश नापित, केपु नगरप्रमुख कृष्ण मान डंगोल, नपां येँ व यलया स्वास्थ्य शाखाया प्रतिनिधिपिसं स्वास्थ्य सुधारया खाँ थः थः गु खाँ काडः दिल ।

उगु छलफल ज्या इवः सं तः तः हांगु अस्पतालय अः पुक स्वास्थ्य सेवा बियमःगु , महिला स्वास्थ्य स्वयमसेविका ज्या इवः मपूनिगु ल्वय पानय्गु, नपां (फागुन महिना : मपुनिगु ल्वयया स्किनिडः महिना) वायु प्रदुषण पानय्गु सूर्तिजन्य पदार्थ पानय्गु व मबिइकेगु स्वय्गु खाँ जूगु खः । मन्त्रालयं स्वनिगया महानगर व नगरपालिकाता हिडान्ह्या दुनयँ च्वय च्वयागु बिषयसं राय सुभाब बिया जक धःगु खः ।

वागीश्वरी महोत्सव

मंसिर २४ गते

ख्वप नगरपालिकाया प्रमुख सुनिल प्रजापति जुं वागीश्वरी कलेज, वागीश्वरी मा. वि. व वागीश्वरी कलेज अफ म्यानेजमेन्टया मंकः गवसालय, ब्वनामिपिनिगु शिक्षण सिकाइ, विज्ञान, प्रविधि व उद्यमशीलताया भावना कुलयता गवसः गवगु नेन्ह्या 'वागीश्वरी उत्सव, हाम्रो महोत्सवं २०८१' सोमवार उलयज्या यासे महोत्सव तः लाय्मः धायोदिसे थुगु महोत्सवं ब्वनामिपिनिगु मेहनत परिश्रम व अनुशासन पिज्वइगु खाँ काडः दिल ।

वयकलं वांगु दायँ भीसं नसा ब्वज्या (खाद्य महोत्सव) याडागु जुल सा थःगुसी अजतः हांक वागीश्वरी महोत्सव डाय्कः च्वडा थुकिं सय्क मदिकक अज बांलागु ज्या इवः हज्याक यंकयगु कुतः याडः च्वडा धायो दिसे थ्व ज्याखं थःपुं लयतायागु खाँ ब्याकसे व्यवस्थापन समिति पाखं सकल ज्या सापिन्ता सुभाय देछायो दिल ।

वागीश्वरी विद्यालय व्यवस्थापन समितिया नायो भाजु नपां वडाध्यक्ष रविन्द्र ज्याख्व (९) जुं ब्वनामिपिन्ता पाठ्यक्रमय् जक लिक्कुं मतः सें उद्यमशील, थःगु तुतिखय् दानय् फःपुं व



व्यवहारिक याय्गु तातुडः थुगु महोत्सव यागु खाँ ब्याक दिल । कलेज व्यवस्थापन समितिया न्वकु मोहन प्रसाद प्रजापति जुं उलेज्यासं बेलुन ब्वयकसे प्रमुख प्रजापति जुं रिवन च्याडः महोत्सवय् इहँ भःगु खः । पाहाँ विशेष पाहाँ पिन्ता धौ, धिमाय थाडः पोडा पुयो लसकुस यागु खः ।

वागीश्वरी कलेज अफ म्यानेजमेन्टया प्राचार्य कृष्ण प्रसाद धन्छाया सभानायोलय् जूगु उगु ज्या इवः महोत्सव गवसाखलया कजिं अबिना श्रेष्ठ लसकुस याडः दय्गु खः । थुकी थी थी ५८ गू स्तल दःगु खाँ स्रोतं धःगु खः ।

ख्वप देशं दुनय् व देशं पिनय्या पर्यटक पिनिगु प्रमुख आकर्षक

मंसिर १९ गते

ख्वप नगरपालिका वडा नं ४ या गवसालय जुगु ख्वप महोत्सवया छलफल ज्या इवः सं ख्वप नगरपालिका प्रमुख सुनिल प्रजापति जुं ख्वप नगरपालिकाया गवसालय याय् ताडागु महोत्सव तःजिक हानयता सकलसिया साथ व गवाहाली दैगु विश्वास प्वंकसे हलिमयया सकल मनुतय्गु खुल्ला संग्रहालय काथं ल्यंकः भिंक तयो तःगु कला, संस्कृति व सम्पदां जःगु ऐतिहासिक व सांस्कृतिक नगरी थौं देशं दुनयँ देशं पिनय्या पर्यटकपिनिगु आकर्षण काथं हज्याड वयो च्वंगु खाँ ब्याक दिल ।



परम्परागत बाजा गाजा, संस्कृति ज्या इवः प्याखं नेवः तिसा वस, नसाज्वलं, परम्परागत कासात, पौभा, तस्वीर, परम्परागत बाद्यवादन ज्वलंत नपां शैक्षिक प्रदर्शनसं न्हँगु पुस्तां नं अपलं खाँ सय्के सिडके दैगु विश्वास प्वंकसे वयकलं

पुरातात्विक महत्वया सम्पदाया खायँ अध्ययन व अनुसन्धानय् हज्याय् फःसा लिपा तःमिगु नगरया काथं पलिस्था जुय फैगु बिचः प्वंकः दिल ।

ज्या इवः या सभाया नायो नपां ४ वडाया वडाध्यक्ष उपेन्द्र सुवालं वडाया थी थी थासय् सांस्कृतिक जात्रा-पर्व, नमुना ब्वज्या परम्परागत कसिमला पायँ कासा नेवः जीवनया ज्या इवः तः ब्वइगु थाय् या खाँ काडः दिल । अथेहे वडाया दुजः कृष्ण सुन्दर प्रजापति, पूर्व जनप्रतिनिधि पशुपति प्रजापति, राजेन्द्र माक, न्हुच्छेराम भेले, हाकुज्या प्रजापति समाजया प्रतिनिधि बालकृष्ण प्रजापति, वडाया सचिव इन्द्र प्रजापतिपिसं नं महोत्सवया व्यवस्थापनया खाँ काडः दिल ।

अथेहे दुमलाचा ४ सं जूगु ज्या इवः सं वडाध्यक्ष उपेन्द्र सुवालं ख्वप देता देशं दुनय व देशं पिनय्या आन्तरिक पर्यटकपुं छक मभ्रसँ मगागु थाय् काथं हज्याय्गु मति गवाहाली यायता यायतांगु ख्वप महोत्सवं थानाया भीगु मौलिक घरेलु तथा साना उद्योग ब्यापार व्यवस्थापनया आर्थिक ज्या इवं जनताया आर्थिक स्तर च्वजाय्केता गवाहाली जुइगु बिचः प्वंकदिल नपां लैड्गिक हिंसा या १६ न्हँ सचेतना व अभिमुखीकरण ज्या इवः जुल ।

ख्वप महोत्सवया प्रचारार्थ साइकल च्याली ।

मंसिर २२ गते

ख्वप नगरपालिकाया गवसालय मंसिर २८ गते निसें पुस २ गतेतक डान्ह्यंक जुइगु ख्वप महोत्सवया खाँ व्याकयुगु इवल्यु शनिवार नेपाल मजदूर किसान पार्टीया केन्द्रीय दुजः नपां वागमती प्रदेशया सांसद भाजु सुरेन्द्र राजगोसाईया न्ह्यलुवाय् जूगु साइकल च्यालीया उलेज्या याडः दिसे वयकलं न्ह्यंगु पुस्ताया पासापिसं साइकल च्यालीपाखं जनताता सचते याय्गु नपां न्ह्यंगु संस्कृतिया विकास जूगु खाँ नपां मदिकक थजगु ज्या न्ह्याकय् फय्मः धायोदिल ।

वयकलयं ख्वप महोत्सव नेपः याय् हे महोत्सव खः धायोदिसे महोत्सव धिसिलाक ब्वचाय्केता स्वनिगःया नपां सकलसिनं थः थः गु थासं ग्वाकयुगु ज्या यासे योगदान याइगु विश्वास प्वंक दिल । नपां पुखां दयकः तकगु कला, संस्कृति व सम्पदात ल्यंकः म्वाकः व भिंकः तय्गुलि महोत्सवं बांलागु ग्वाहाली याइगु खाँ काडः दिल ।

वयकलं पुखां त्वःत तकगु कला, संस्कृति व सीपत कुल- दिसे कि देशं पिनयया पर्यटकपिनिगु मन सालः कायता महोत्सव याय् खाँ काडः दिल ।

ख्वप नगरपालिका वडा नं ९ या वडाध्यक्ष रबिन्द्र ज्याख्व जुं पर्यटकीय ल्याखं ख्वप दे सुरक्षित व यच्चपिचुगु थाय् खः दक क्यनय्गु ई नपां महोत्सवा इलय ख्वपया जनताया म्वाय्गु पहः ब्वयगु नपां न्ह्यंगु पुस्ताता भीगु थःगु मौलिक सीप

ख्वप महोत्सवया प्रचारार्थ संस्कृतिकःमि मुंकलः

मंसिर १९ गते

ख्वप महोत्सवय् पिब्वइगु थी थी सांस्कृतिक ज्या इवः त बांलाकः क्यनय्ता ख्वप नगरपालिकाया गवसालय् मुंकगु संस्कृतिक कःमि भेलासं ख्वप नगरपालिकाया प्रमुख सुनिल प्रजापति जुं महोत्सव तःजिक हानय्ता स्वापु दःपुं मनूत नपां स्वापु ततं सल्लाह्यासैं वयागु नपां ख्वपया जीवन शैली, नसात्वसा, शैक्षिक ज्या इवः सांस्कृतिक ज्या इवः, परम्परागत सीप व कासात पिब्वयगु तातुडः ख्वप महोत्सव गवःसः ग्वयागु खाँ ब्याकः दिल ।

ख्वपया धिसिलागु पर्यटन विकास व प्रवर्द्धनय् नं महोत्सवं विशेष घ्वासा बियगु तातुडः याडागु महोत्सवता अज लसतां जाय्कः हार्यपुक डाय्केता सकल सिया साथ व ग्वाहाली मदयकः मगा धायोदिल ।

ख्वपया जनताया स्थल्लागु ग्वाहाली ख्वपया विकास हज्याय फःगु खाँ ब्याकसे वयकलं थुगु महोत्सपं ख्वपया अध्ययन अनुसन्धानयाइपिन्ता छगू बांलागु मौका जुइगु खाँ ब्याकसे सम्पदा ल्हवनय्-कानय् ज्याख्य विदेशी तय्के ध्याछ हे धेबा मकसैं स्थानीय

लः ल्हाय् दैगु खाँ काडः दिल ।

ज्या इवःसं भक्तपुर महोत्सव सचिवालयया कजि गौतम प्रसाद लासिवं लसकुस याडः दिलसा न्ह्यंगु किजू व सुमित बालां नं न्वचु तयो द्युगु जुल । साइकल च्याली ख्वपया दतात्रयं न्ह्याकः थिमि बोडे, पेप्सिकोला, हाँडीगाउँ वसन्तपुर दरवार,



टेकु, त्रिपुरेश्वर, ग्वाको, कोटेश्वर, सूर्यविनायक जुयो लिवाली थ्यंकः ब्वचःगु खः ।

अथेहे ख्वप नगरपालिका वडा नं. ६ सं श्रमजीवी बचत व ऋण सहकारी संस्था लि. या न्ह्यलुवाय् ख्वप महोत्सव २०८१ या प्रचारार्थ वडा ब्याकः सचुकुचु ज्या इवः नं जूगु जुल ।

जनताया साथ व ग्वाहाली ख्वपया सम्पदात व विकास याय् फःगु खः धायो दिल ।

वयकलं ख्वपया न्हाड वांगु सम्पदाता मुलः उत्खनन याडः भीगु थःगु हे मौलिक पहःलं हे दानयगु व ताडः वांगु सम्पदात मालः ल्यंकः म्वाक तय्गु कुतः ह्छ्याड च्वंगु दः धायोदिल ।

अथेहे वडा नं ९ या वडाध्यक्ष नपां ख्वप महोत्सव सांस्कृतिक कार्यक्रम व्यवस्थापन समितिया कजि रबिन्द्र ज्याख्वं महोत्सवय् जुइगु संस्कृतिक ब्वज्या व्यवस्थित याय्गु विषयसं खाँ व्याक दिल ।

वयकलं सांस्कृतिक प्रस्तुति पाख्य १४८ थव दर्ता जूगु खाँ ब्याकसे महोत्सवया इलय २९ गते क्वाठण्डौ त्वालय खुल्ला बाँसूरीया धिं धिं बल्ला जुइगु खाँ ब्याक दिल । नपां भक्तपुर महोत्सव सचिवालयया कजि गौतमप्रसाद लासिव जुं अः तक जुय धुंगु ज्यात काडः दिलसा समितिया दुजः हेरा ख्याजुं नं महोत्सवया खाँ ब्याकः दिल ।

खवप महोत्सवय पाहाँ द्यो खः धाय्कः हानय्गु

मंसिर २३ गते



नेपाल स्काउट स्थानीय स्काउट कार्यालय भक्तपुर नगरपालिकाया गवसालय खवप नगरपालिका या गवसालय मंसिर २८ गते, निसैं पुस २ गते तक जुइगु खवप महोत्सव २०८१ या तयारी काथं स्काउट मास्टरपुं व स्काउटया न्हयलुवापुं खवप नगरपालिका सभा हल्य् मुंकः उपप्रमुख नपां नेपाल स्काउट स्थानीय कार्यालय खवप नगरपालिका प्रमुख रजनी जोशी जुं खवप महोत्सवता अतिथि देवः भवः धाय्गु खौं याता पाय्छि काथं छ्यलः क्यनयता अभियान काथं काय् मःगु बिचः प्वंकसे महोत्सव तः जिकः धिसिलाक, हिसिदय्क क्वचाय्केगु भी फुक्क सिया मंकः दायित्व खः धायोदिल ।

खवप महोत्सवय् यचु पिचुगु खवप दे दक क्यनय् मःगु

मंसिर २४ गते

खवप महोत्सवया प्रचारया इवल्य् खवप नगरपालिकाया गवसालय् छिकोडः कासा ब्वज्या खवपया लाय्कुली क्यन ।

ज्या इवः सं नेपाल मजदुर किसान पार्टीया छ्याञ्जे नपां संघीय सांसद प्रेम सुवालं छिकोडः कासा म्हेतिपिनिगु जीवय दुनय व पिनय्या अङ्गत बल्लाइगु नपां भीसं जीवयता निंगु नसा नपां शारीरिक अभ्यास नं याय् मः धायोदिल ।

वयकलं छिकोडः श्वास प्रश्वास नपां स्वापु दःगु जूगुलिं थुकिं जीउ दुनयया स्वे, नुगः, किडनी बल्लाक बिई । छिकोडः अभ्यासं घाँटीया टन्सिल नपां लांगु खौं थुगु अभ्यास याडः च्वंपिसं धःगु दः ।

संतुलित नसा धाय्वं बिषादी मरुगु नसा व तरकारी, नयम धायो दिसे वयकलं उकिया लागिं बस्तीया चाकलीं भीसं हे तरकारी बा याय्मः धायो दिल ।

वयकलं सन १९५० सन्धी उब्बेया सरकारया प्रधानमन्त्री भारत नपां यागु सम्भौतासं नेपः ता मःगु सामान भारतकय् हे न्याय मःगु खौं तयो भारतीय एकाधिकार पुँजी नेपः देता रायायनिक (देशी) सःनपां इलय मबिइगु दाउ स्वयो च्वंगु दः गुकिं नेपः या अर्थतन्त्र भारतया लाहातय् लाडः च्वंगु दः धाय् फः ।

खवप महोत्सवय थानाया भेषभूषा, प्याखं बाजा गाजा

वयकलं कला, सस्कृति व सम्पदात ल्यंकः म्वाकः तय्गु ज्या जक खवप नगरपालिकां याडः वगु मखुसैं शिक्षा व स्वास्थ्यता नं उलि हे हदायतयो ज्या याडः वयो च्वंगु ज्या इवः तः नं खवप महोत्सवय् पिब्वइगु खौं काडः दिल ।

खवप नगरपालिका वडा नं. ९ या वडाध्यक्ष रबिन्द्र ज्याख्वं नं स्काउटया म्हासिइका धाय्गु हे अनुशासन खः धायोदिसे महोत्सवय् द्रुहँ भाइपुं नपां स्वः भाइपुं देशं दुनय व देशं पिनय्या पर्यटकपिन्ता स्वयता चाहिलयता अःपुकः काथंछिक बिइगु विश्वास प्वंकः दिल । वयकलं खवप महोत्सवय् सामाजिक सांस्कृतिक नपांया थी थी लागाय् स्काउटया ब्यवस्थापन तस्कं बांलाइगु खौं काडः दिल ।

मुंज्यासं नेपाल स्काउट स्थानीय स्काउट खवप नगरपालिका सल्लाहकार भक्तराज भण्डारी, स्थानीय स्काउट भक्तपुर नगरपालिकाया आयुक्त बालकृष्ण वनमाला, मध्यपुर थिमि नगरपालिकाया आयुक्त तुल्लि हरि प्रजापति, नेपाल स्काउट, स्थानीय स्काउट, भक्तपुर नगरपालिकाया परिषदया दुजः कृष्ण प्रसाद धन्छा, कृष्णाराम त्वानावासु व राजेश गाउँजुं नं थः थः गु बिचः प्वंकः दय्गु खः ।



नपां यचुपिचु लकस व बांलागु, जीवता निनिगु नसात बियमःगु खौं नं वयकलं व्याक दिल ।

खवप नगरपालिकाया प्रमुख सुनिल प्रजापति जुं खवप महोत्सव तःजिक हनयता सकल सिनं ग्वाहाली यायता इनाप यासे नगरयर् सुचुकुचु यायगुलि सकल सिया ध्यान वानय् मः धायो दिल । खवप दे या म्हासिइका पिब्वयफैगु काथं ब्वज्यायाय् मःगु महोत्सव लुमांकय् बहः जुइगु काथं डाय्केता थः थः गु थासं ग्वाहाली याय् मः गु खौं नं प्रमुख प्रजापति जुं धायोदिल ।

उप प्रमुख रजनी जोशी वडाध्यक्ष श्यामकृष्ण खत्री(१) व वडाया दुजः राम सुन्दर बासीं नं न्वचु तयो दय्गु उगु ज्या इवः सं भक्तपुर महोत्सव सचिवालयया कजि गौतम प्रसाद लासिवं महोत्सवया महत्व काडः दिल ।

नायो भाजु बिजुकुछै जु पाखं खप महोत्सव उलेज्या

मंसिर २८ गते

खप नगरपालिकाया गवसालय मंसिर २८ गते निसैं पौष २ गते तक जुइगु डान्ह्या खप महोत्सव २०८१ या उलेज्या नेपाल मजदुर किसान पार्टीया नायो भाजु नपां नेपः या वरिष्ठ राजनीतिज्ञ नारायण मान बिजुकुछै (रोहित) जुं विश्व सम्पदाया धलः खय् नां जःगु खपया लायकुली छगू भब्य समारोहसं याडः दिसे वहे लसताय खप नगरपालिकां पिथांगु 'स्मारिका' खपः पौ) व सांस्कृतिक नगरी खपया 'क्रिपा साफू' नं चिखी फ्यनय्गु ज्या याडः दिल ।



पानसय् मता च्याकः उलेज्या याडः : दिसे वयकलं खपया कला, संस्कृति व सम्पदात ल्यंकः म्वाकः भिंकः तय्गु ज्या याता न्हूंगु पुस्तां थःगु कर्तव्य भःपियो ज्या याडः वगु खाँ ब्याकसे कला व संस्कृति ल्हवनय्, कानय व ल्यंकः भिंकः तय्गु ज्याख्व खपय् खपया जनतां श्रमदान (ज्या ग्वाहाली) नपां थमनं फक्व चन्दा नं बियो चां न्हिं मधसैं बिचः याडः च्वंगु दः धायोदिसे थजगु ज्यायाय्ता मन क्वसाय्केता ऐन-कानून, लबः नय्गु, धेबा कमेयाय्गु लोभय् मखु बरु देश व जनताया निःस्वार्थ रूपं सेवा याय्गु भावनां घ्वाडः यंकगु मानवीय भावनां खः धायोदिल ।

वयकलं स्थानीय पालिकात प्रजातन्त्रया लिधंसा खः । स्थानीय पालिकाया जनतात व जनप्रतिनिधिपुं 'देश व जनताया निःस्वार्थरूपं सेवायाय्गु भावना ब्वमलापुं गां, नगर, जिल्ला प्रदेश व केन्द्रया थी थी निकाय, कार्यालय, विभाग व मन्त्रालयसं भ्रष्टाचार, अनियमितता व अख्तियार दुरुपयोगया थी थी कानूनी व नैतिक खाँत प्याहाँ च्वंगु दः । नेपःमिपिनिगु थःगु अनुभवं धायो च्वंगु दः- 'राजनैतिक दल व नेताथें ब्वनयकुथि व ब्वकिपुं

शिक्षकपुं गुब्लेतक चिच्यामनं त्वःत थाहाँ वय फै मखुनी उब्लेतक देश व जनताया मतिव इच्छा ता धात्थें खय्कः पू वांकय् फै मखुनी ।'

मित्रराष्ट्रं नेपः व नेपः मिपिन्ता ब्यूगु यक्व आधुनिक कलकारखानात, उद्योग व सेवाया ज्या इवः छगू छगू यायां मियो, मखु थाय् छ्यल, निजीकरण यासेलिं नेपःमिपुं तुगः मुइकः च्वनय् मःगु क्वा क्वागु खाँ काडः दिसे नायो भाजु बिजुकुछै जुं गाँ, नगर, जिल्ला, प्रदेश व केन्द्र नपां नेपः दे व नेपः मिपिन्ता थःगु दे थःगु तुतीखं चुयो दानय फय्केगु भावनां मग्वाकसैं विदेशीया भरय व अमिसं धःथें जक ज्या सांसा ८० लाख ल्यासे ल्याम्होपुं जक विदेशय् वानय् मःगु मखु व स्वयो नं अज तः तः हांगु दुर्दशात स्वयमाली तिनी जक धायो दिल ।

वयकलं मानव सभ्यता स्वयो, ब्वडः थुईकेता विश्वविद्यालयया प्राध्यापक पुं म्युजियम वा संग्रहालय स्वयो ब्वं वानी । जीवशास्त्र थुइकः ब्वनय्ता चिडिया घरय् वानि । चित्रकला, वास्तुकला व संस्कृतिया खाँ थुइक ब्वनय्ता सांस्कृतिक नगरय् वयो स्वयो ब्वनि । तारा मण्डल (तुग पुचः), ग्रह व आकाशगङ्गाया खाँ थुईकेता छगू छगू नगरय् प्लानिटोरियम वा नक्षत्र अध्ययनशाला दय्क तयमः धायोदिल ।

नेपाल मजदुर किसान पार्टीया छ्याञ्जे नपां संघीय सांसद प्रेम सुवाल जुं नेपाल मजदुर किसान पार्टी स्थानीय तह निर्वाचन घोषणा-पत्र पाखं जनताता ब्यूगु बचं काथं खप नगरपालिकां शिशु स्याहार केन्द्र निसे कलेजतक चाय्कः जनताया सेवा याड वगु खाँ नपां खप विश्वविद्यालय चाय्क दांकः भिंकः बांलाकः अःपुक चिकित्सा शिक्षा नं ब्वकय्गु तातुडः च्वंगु खाँ ब्याकसे देशय् माथांक विकास याडः स्वनिगलय् पिनय्न् च्वं वैपिन्ता पानय्गु ज्या सरकारं मथां याय् मःगु खाँ ब्याकः दिल नपां खप नगरपालिकां पर्यटक पिन्के कायो वगु धेबां खपया विकासय् छ्यलः वगु खाँ नं ब्याक दिल ।

खप देता सांस्कृतिक नगर क्वःछिडः नमूना नगरकाथं ह्छ्याय्ता सरकारं बः याय्मः धायोदिसे वयकलं खप सल्लाघारीया १०८ पी जग्गा खप विश्वविद्यालय मथां स्वीकृति बिइगुलि थः बिश्वस्त जुयागु खाँ नं काडः दिल ।

खप महोत्सव मूल समारोह समितिया नायोभाजू नपां खप नगरपालिकाया प्रमुख सुनिल प्रजापतिजुं महोत्सव ज्वः छि खप दे धात्थें नखा (महोत्सवमय) थें हे भः भः धाइगु खाँ ब्याकसे हिलः मालः ब्वनिपिन्ता अध्ययन अनुसन्धान खप महोत्सव



छगू धात्थेगु सयकेगु मौकाथे जुइगु खाँ ब्याकसे महोत्सवय् नगरपालिकां धायो तःगु इर गू थासय् महत्वं जःगू ज्या इवः न्ह्याक खाँ कुल दिसे खपया त्वः त्वालय्, गल्ली, चुकय् नं खपया जनतां स्वय हायँपुइगु ज्या इवः न्ह्याकः च्वनिगु खाँ नं ब्याकः दिल ।

देशं दुनय् व देशपिनय्या पर्यटकपुं नं सालय्गु तातुडः खप महोत्सव याडागु खाँ ब्याकसे वयकलं महोत्सवय् खपया म्वाय्गु कला, नसा त्वँसा शैक्षिक गतिविधि सांस्कृतिक ज्या इवः त परम्परागत सीप व कासानपां थी थी स्वय हायँपुगु ज्या इवः त जुइगु खाँ काडः दिल ।

महोत्सव अज हिसिदय्केता थुब्ले हे खप नगरपालिका वडा नं १० क्वाठण्डौसं मंसिर २९ गते बाँसुरी बाजाया खुल्ला धिंधिं बल्ला जुइगु खाँ ब्याकसे महोत्सव तः जिक हानय्ता सकलसिया ग्वाहाली नं फवडः दिल ।

यल महानगरपालिकाया उप प्रमुख मञ्जली शाक्य जुं खप महोत्सव स्वनिगःया निंतिं छगू सयकेगु काथं जुइगु खाँ ब्याकसे खप देता पर्यटकीय मू थाय् काथं काय फँगु खाँ कुल दिसे वयकलं भ्नीगु थः गु पहः या मौलिक वस्तुता विज्ञान नपां

स्वाडः अन्तरराष्ट्रिय करण याय् मः धायो दिल ।

खप देता ज्ञान विज्ञानया केन्द्र दय्केगु खपया तातुना च्वछाय बहजुगु खाँ ब्याकसे वयकलं खपया सम्पदा खपया जनतां थः भः पियो ज्या खाँ फुक्क गुलिं ग्वाहाली याडः च्वंगु सकसिनं सय्के बहःजू धायोदिल ।

७५३ गू स्थानीय तहया लागिं खप दे ब्वस्यलागु खाँ ब्याकसे वयकलं स्वनिगया सांस्कृतिक सम्पदा ल्यंकः म्वाकः भिंकः तय्गु (दायित्व) ज्या सकलें जनता छप्पा जुयो याय्मः धायो दिल ।

नेमकिपा बागमती प्रदेशया दुजः सुरेन्द्र राज गोसाईं जुं खप महोत्सवता खपया शैक्षिक, सामाजिक, राजनीतिक काथं च्वः जायो वगु छगू विस्कं पहः या अभियान काथं काय् फः धायोदिसे खप देता थुकाथं च्वजाय्कः हःनय् यंक महोत्सव धिसिलागु पला जुइगु खाँ ब्याकसे खप दे न्ह्यागुं लागाय् न्हाप लाडः च्वंगु खाँ कुलः दिल ।

खपय् डालकाय् बहगु अनेक बिषय दःगु खाँत यक्व दः धायो दिसे वयकलं महोत्सव सदां लुमंति वैगु काथं क्वचाइगु विश्वास प्वंकःदिल । खप दे कलाकार, कलाकःमि व सम्पदा

सच्छिब्त स्तीच्यागूगु खप पौ, ब.छि पौ(पाक्षिक)

प्रेमी पिनिगु सहर खः धायो दिसे खप देशय् ज्यासाडः नैपुं श्रमवीर पिन्ता हानयज्या मदिकक हज्याडः वानिगु विश्वास प्वंकः दिल ।

छगू छगू सम्पदासं यक्वयक्व कालिगढपिनिगु हिचःतिं किडः च्वनिगु खाँ न्हँगु पुस्ताता काकां यंकय्मःगु खाँ ब्याकसे वयकलं श्व म्वाडः च्वंगु खप दे दयकेगुलि न्हयलुवा पिनिगु तः हांगु लाहा दःगु नपां खप नगरपालिकां याडः च्वंगु ज्या या लिचवः खः धायोदिल । नपां खप देशं देशया इज्जत तयो वयो च्वंगु अलय खप दे प्रति हलिमयया विश्वास अप्वयो वांगु दसु नं पिब्वसे सांस्कृतिक व पुरातात्विकया लिधंसाय् जक मखुसँ राजनैतिक लिधंसाय नं विस्कं गौरव कः घाडः खप देशं हलिमय इज्जत व विश्वास छकलं हे कायो च्वंगु दः धायो दिल ।

नेमकिपा वागमती प्रदेश सभाया दुजः सृजना सँजुं खपदे सभ्यताया सहर प्राचीन कला संस्कृतिया नगर, इतिहास जीवन्त म्वाडः च्वंगु सहर खः धायोदिसे पर्यटन अर्थतन्त्रपाखं खप दे हज्यायता कुतः याडः च्वंगु खाँ ब्याकसे उत्पादन नपां स्वाडः मवांगु पर्यटनता मतुइगु खाँ नपां खप दे छन्हूंतुं दःगु मखु थानाया जनतां थापाच्चः बांलागु वैभवशाली खपदे दयकगु व ल्हवनय्-कानय् व दानय्गु ज्या याडः च्वंगु खः धायोदिल ।

जनताया जीवनस्तर च्वजाय्केता धिसिलागु पला खप महोत्सवं विइगु विश्वास प्वंकसे वयकलं सम्पदा ल्यंकः म्वाकः भिंक तय्गु व सभ्यता हकनं लिफ्यडः ह्यगुलि ज्वःमरुगु नमुना काथं खप देश हज्याडः च्वंगु खाँ ब्याकसे 'सच्छिदा लिपाया खप दे' या म्हागस हज्याकः ह्यगुता महोत्सवं ग्वाहाली याइगु विचः नपां महोत्सव ग्वसः ग्वगुलिं अपलं सुभाय देछायो दिल ।

खप नगरपालिकाया उपप्रमुख रजनी जोशीं उत्सवै उत्सवया खप देशय् खप नगरपालिकां खप महोत्सव ग्वसः ग्वयो थानाया भ्नीगु पहः या मौलिक कला संस्कृति व सम्पदा हलिमय ब्याक पिब्वय दैगु मौका दःगु नपां शिक्षा लागाय् खप नगरपालिकां याडः वगु ज्याखं खप दे ज्ञान-विज्ञानया मूथाय् याय्ता ग्वाहाली जूगु नपां खप विश्वविद्यालय चाय्केता कुतः जुयो च्वंगु खाँ नं ब्याक दिल ।

पुरातत्व विभागया महा निर्देशक शौभाग्य प्रधानाङ्ग जुं महोत्सव तः लायमः धायोदिसे खपया मूर्त व अमूर्त सम्पदा हलिमय नां दांगु खाँ ब्याकसे थुगु उत्सव पाखं खपया शैक्षिक व सांस्कृतिक हकनं लिफ्यडः ह्यता ग्वाहाली जूइगु विश्वास नं प्वंकः दिल ।

महोत्सवं हायैपुकय्गु जक महुखसँ समाजता धिसिलाक हछ्याय्ता लॉपु क्यनिगु छगू बांलागु लुखा चःथें जूइगु खाँ ब्याकसे

वयकलं २०७२ सालं स्यंकः थुडः ब्यूगु सम्पदात ल्हवनय् कानय् ज्याखय् नेपाल सरकार, मन्त्रालय, पुरातत्व विभाग स्थानीय तह व थी थी संघ संस्था नपां मिलय जुयो ८२० गू सम्पदा भ्नीगु थःगु मौलिक पहलं दय्के धुंगु खाँ काडः दिल ।

भक्तपुर जिल्लाया प्रमुख जिल्ला अधिकारी गोपाल प्रसाद अर्याल जुं खप देया गौरवता हलिमय ब्याकः ब्वज्या याय्गु छगू मौका काथं बांलागु ज्या महोत्सवं बिइगु नपां देशय् पर्यटन च्वजाय्केता नं ग्वाहाली जुइ धायो दिल ।

खप नगरपालिकाया प्रमुख प्रशासकीय अधिकृत वसन्त भट्टराई जुं सुभाय देछायो द्यूगु खः सा वडा नं. ९ या वडाध्यक्ष रविन्द्र ज्याख्वं नं न्वचु तयो द्यूगु खः ।

उवलेज्या ज्या इवः लिपा मू पाहाँ विशेष पाहाँ व पाहाँपिसं खप महोत्सवय् पिब्वगु थी थी थासय् भायो स्वयो दिल । श्वहे इवल्य वडा नं. १० क्वाठण्डौ त्वालय् मंसिर २९ गते खुला बाँसुरी बाजाया धिं धिं बल्ला नं ग्वसः ग्वगु जुल ।

महोत्सव सं साँस्कृतिक ब्वज्या, नगरावादन, पौभा व तस्वीर ब्वज्या, किपा ब्वज्या, छ्वालीया व तस्वीर ब्वज्या, का छियगु, कुमारी ब्वयगु, दीपंकर बुद्ध ब्वज्या, नवदुर्गा द्यो ब्वयकय्गु, शैक्षिक ब्वज्या, नौका (डुड्गा) विहार, चा भाला ब्वज्या (न्हँगु व पुलांगु), मू ब्वज्या काथं पिब्वइसा अथेहे परम्परागत कासा ब्वज्या, नेवः संस्कारया ज्या इवः, नौबाजा ब्वज्या, धौ महोत्सव, पालाचा च्याकय्गु, बौद्ध पिथना व तस्वीर ब्वज्या, सहकारी ज्या इवः, मचा क्यबः, ज्या इव नपां साँस्कृतिक ब्वज्या, कृषि उत्पादन व हस्तकला क्वज्या, ब्यापार मेला, साफू ब्वज्या, बुद्ध अस्तु व बौद्ध दर्शनया ब्वज्या, चिकं काकय्गु, साँस्कृतिक जात्रा पर्व संस्कृतिया नमुनात थी थी स्वय लाइकगु महोत्सवया ज्या इवः खय् ला ।

अथेहे पुलांगु खः प्याखंया पुलांगु तिसा वस ब्वज्या, गाठामगः, ताहामचाया नमुना ब्वज्या नं जुई ।

ज्या इवः न्ह्याकय्ता भक्तपुर महोत्सव ज्याली खप नगरपालिकाया प्रमुख सुनिल प्रजापति जु न्वचु तयो याडःदिल । वयकलं खप देता पर्यटकीय गन्तब्यस्थल काथं हछ्याय्गु गुकिं देशं दुनय व देशं पिनयया पर्यटकपुं सालय्ता ग्वाहाली जुई धायो दिलसा उगु ज्या भ्वःसं ५ वडाया वडाध्यक्ष योगेन्द्रमान बिजुक्छें जुं नं न्वचु तयो द्यूगु खः ।

ज्याली सं जनप्रतिनिधिपुं, पूर्व जनप्रतिनिधिपुं, जिल्लाया थी थी संघ संस्थाया प्रतिनिधिपुं, नगरया हानय् मःपुं विशिष्ट मनूत, ब्वनयकुथि व सहकारीया प्रतिनिधिपुं, स्काउट, सुरक्षाकःमि कासामिपुं थी थी बाजा पुचः, ग्वाहाली पुचः, नगरपालिकाया कर्मचारीपुं व स्थानीय जनतात उपस्थित जूगु खः ।

पूर्वाञ्चल विश्व विद्यालयया रजिष्ट्रार ख्वप नगरपालिकाय्

(२०८१ मंसिर १४ गते)



ख्वप महोत्सवया खास्यै पत्रकार नपालाय्गु ज्याइवः

(२०८१ मंसिर २६ गते)





बखप नगरपालिका ढाडः च्यांगु धी धी सम्पढात बख भःले
नायो भाजु बिजुकुछै जु (२०८१ मंसिर १८ गते)



बखप महोत्सव न्ह्याकयता जूगु ठलेज्या च्याली
(२०८१ मंसिर २८ गते)